



天耳堂文集



天耳堂文集叙



立身顯親士君子之大節也然

自顯其親何若令親之自顯能

揚其親之盛焉者載耿其光表

見奕世此韓子所以嘆有後之

難也

珂

先人明經科第相繼咸



著文名曾有父子兄弟合集同  
邑太保孫恭介公序而題之曰  
三不朽集蓋美其可傳也已載  
名邑志而貧未卽梓明季之亂  
同屋宇焚于倭兵先嚴深憾以  
爲不能守而泯沒之嗣續之不

肖也

珂

荅人有句云可憐尙有

文孫後不守先賢一字留嗟乎  
豈非數世之憾事哉嗣裁司李  
分符壽昌得與陽穀王瞻文寅  
翁爲近隣敦伯仲之誼暇遇論  
文一日梓天耳堂文集相示蓋

其尊甫廩坊先生所著者求

珂

爲序

珂

讀其詩與博奇崛遠絕

浮響非世之貌襲唐音者儷其

文瑰偉富麗自成一家亦不蹈

衆趨之徑嗚呼盛哉有爲之後

盛而必傳不在是款座客聞余

嘆賞進言曰如先生詩文之佳

卽不有于後珠玉輝光寧可終

遏耶余曰唯唯歐陽公有言凡

文之行必有待焉龍門史記曾

待楊惲始布子雲太佺亦待桓

譚方行夫史記太佺世之至文



猶久之而待于異姓君子慨二  
公之無後矣蘇中書在禁苑著  
述甚富而舍人繼之其名益彰  
今觀于先生之作固宜侍從禁  
苑如中書當年天下自以此事  
歸之乃位不稱德聞其名者不  
克見其實今瞻文方刊文集行  
于世閔言高論光燄如新發于  
硯從此始爲藝林之鴻寶不顯  
哉焯然傳遠矣詩曰君子有孝  
子先生之謂乎又曰孝子不匱  
瞻文之謂也使瞻文知

珂先集

失守憾悼無已其自愉當何如  
珂見暄文是刻益增其愧歎景  
慕者又當何如耶暄文自刻詩  
集附于後珂更有古風詠之  
康熙癸丑冬抄

年家後學西京曹玉珂

敬言





天耳堂文集

目次

桐城王

杰廩坊甫著

男天壁

全校

姪文燦

卷之一

敘

盛大勲卿羽泉公八袞敘

代

大中丞海鹽徐公壽敘


代

李進士媳黃孺人八袞敘

代

賀劉廣文榮薦敘

代



汪母七袞壽敘

代

姚白也母夫人六袞壽敘

代

姚母項封孺人六袞壽敘

代

陳邑侯鐫課士錄敘

賀劉學師秩滿敘

刊方太恭人八袞壽言敘

聞不句物詠敘

宋進士元夫文敘

文天夢先生詩敘

朱蟬所夫婦雙壽敘

代

黃廣文榮薦敘

募賑粥敘

戴巨卿五十敘

卷之二

祭文

祭姚大叅文

代

祭姚大叅文

其二

祭潘少司馬文

代

祭余母廉憲姪婦文

代

祭蔣子卿母夫人文

代



祭倪孝廉夫人文 代

祭方母趙太恭人文

祭方廷尉公文 代

祭何吏部封翁文 代

祭夏母文

祭漂陽鮑餘菴文 代

祭吳誠菴文

祭方唐山先生文

祭陳茂才文

祭童育之文

祭潘篤如茂才文 代

祭潘念吾文

祭方克壯文 代

祭方克壯文 其二代潘阮兩壻作

祭廬江 氏文 代

卷之三

書

寄南博士成公書 陝進士

寄葉庶子書

侯阮光祿集之書

上何文端相國書 代通序

上蔡文宗書 代邑紳

與方楚撫書

啟

候景陵劉會元啟 代

候崇陽王御史啟 代

候黃石齋宮詹 代

答宋進士啟

穀城令阮實甫殉難請卹啟

候陳中尊啟

請陳郡守啟 代

候兵憲啟 代

候王總憲啟 代

迎朱司李啟 代

答陳明府啟 代

壽林吏部啟 代

納婚啟 代姚與張

回婚啟 代姚回方

聘婚啟

卷之四



雜著

桃李門公論

茶梅賦

東橋碑記 代

筆花堂記

新義社會記

高廟建文昌祠募疏

募鑄幽冥鐘引 代

梭龍小引

童南軒傳

童母昌孺人傳

許孺人傳

生白上人讚

小像讚

松石讚

構堂四箴

邑庠公舉重修黌宮呈

姚繩先舉送太學公呈

天耳堂文集

桐城王

杰廩坊甫著

男天壁

侄文燦

全校

敘

盛大勲卿翁泉公八袞敘

代

周官司徒貳以掌教灋稽國中漢官光祿勲典吏署  
為九列首夫安擾九野與侍從九闈何如清要耶公  
世席此重秩且歲八十若童牙行將壽逾司徒公者  
遐無筭彼祝者曰西池桃耶東海桑耶幻也胡不聞



南山臺北山萊德基邦家而後乃壽無期也勿問香山洛社皤然神仙中人固多社稷臣卽今日聖天子歲遣壁帛存問二三元碩與從三老五更而醬醢之倘得授蒲輪玉杖豈翳異人必今之德音是茂者夫德音不已則未有若我公者矣方其父兄尊顯甫廿餘登巍甲筮戶曹而疊晉之右轄于秦左轄于蜀也貢賦比要之司環丘甸縣都惟所出納耳孰使其吞芳茹潔炯然層冰出萬壑而復置之迎風涵露之玉壺乎古亦有委珠璣殿上投犀象江中者或皎皎賣名稱茲則惟有廐馬知齋梁魚知懸琴旁夜鶴知其焚香告蒼蒼而已維時司徒尚存臣父清畏人知冰蘖特甚有如孟宗爲光祿始監漁雷池此吾皖近鑿也手網舉魚爲鮓奉母母封還責之非比胡質守荊州雖廉猶以俸買絹爲兒衣累者公之庭疑有廉泉耶不然而陸大夫橐安往也豈兩世官頭銜不致囊有餘財餘帛以累我聖朝者視凡銅山金埒果何如鬱林幾片石耶宦嘗歎歷兵刑間以飭伍無冤民敘閱矣兩提場兩筦計以士悅吏安敘閱矣况乎蕩平播逆獨任始終且經理善後功重疆場會擬節鉞茲卽不屑以請長纓易一貂帽玉帶然燕然十丈碑能



無勒數字而返及視邛棘九折坂早已叱星輅而南也  
也尊匪吳江菊非彭澤歸去來今胡爲乎碧山焚銀  
魚也謂辭尊而卑則一起靖邊道似矣謂辭新而舊  
則再起晉左轄似矣湖山如舊吏民習知手一笏量  
芟履地直臥鎮耳一竿風月半榻烟霞歸去來兮又  
胡爲乎竟南山之南北山之北也某知之矣公自計  
謂生平治兵刑農儒罔不得當獨未親司牧及處言  
路耳于是乎以如傷若瘵之意歸而見之鄉鄰邦族  
焉岩栖雲臥未嘗一朔望謁郡縣旦夕狎市井夫竿  
牘筐篚通有司與黠無賴杯酒接殷勤則人得甘我

于醉飽之餘而毒蜚必民受之其門不市其心誠水  
已若言路之紛吹當在熹廟時動遭仗馬之斥逆璫  
羅織諸骨鯁俱轉相黨錮公松柏獨立猶以里戚蔓  
延幾危乃安則其不駮駟豸繡令人截惠文冠之角  
者幸也惟是內召清華始閒閒署勳卿職按職儀云  
勳闈也秦之郎中令掌宮殿唐以來爲膳卿在周官  
則內外饗其鼎鑊以給水火之齊且今上珍無八物  
飲不六清徹樂減膳奚啻恤蛤蜊數千錢然而醴作  
麴蘖羨作鹽梅成周太和尙當自鼎鼐調之我公  
以清純恬曠之素爲國家醞和平又以其食霞服露



吐納沆瀣之精上助恭默思道之主勤行修煉孰過  
 此哉兼以高山流水操絕懷陵時弄之蘿石松清之  
 際可使丹鳳鳴而玄鶴舞以此通八方協四序又調  
 鼎之餘和矣雅工奕善草大書堪徑丈之勢詩賦可  
 灑灑千帙而每作小篇不苦吟傷天年其冲養然矣  
 蓋富貴而易艾者未盡乎人公二十年貴公子十年  
 介弟通籍又幾六十年乃孝廉君玉樹金莖編摩琬  
 琰將偕其從季孝廉連憤公車成進士學術滿著作  
 之廷而文學君孫克似鳳掞藻春華榜花欲列梧桐  
 樹下識名家莫公若也壽善而易艾者未盡乎天前  
 司徒公七袞有六余邑頂禮為萬人祝所自始公健  
 步善啖視聽歌嘯不衰登山或進鳩杖輒擲之化葛  
 坡龍去而詒穀惟肖四葉皆斧藻仁義有珪璋令範  
 善人天地之紀元愷世濟其美又莫公若也老氏曰  
 上善若水水德淡中泉玄內鏡至柔好卑和協道性  
 以舉似公其微合清淨之詣歟乃議者又謂仁靜如  
 山德如其基壽如其產若夫松新翠薄桂小丹輕曷  
 不遂祝之曰溟海之棗如瓜鍾陵之李如瓶食之生  
 奇光又奚啻薑萊枸桠之頌僅黃耆保艾而已哉

大中丞海鹽徐公壽敘 代



百里而侯雷封也萬物尊天而愛風雨若令風而有  
所待噓令雨有所仰濡無爲尊天而貴雷矣吾侯之  
能豫桐人者其以是乎來驅單父之車去留壽春之  
犢公卿贈陸宣之串茶父老餞趙亮之杯水抑孰知  
門墻一瓣香尤甚于畏壘之尸祝乎憶製錦之始簿  
書鞅掌汗流竟日區區鉛槧奚足煩青鏤品題乃日  
開西邸給毫素群牝牡儷黃其中九方一顧冀北爲  
空且有特拔自童試者尤鹽車之伯樂乎尋主政留  
都部下有來謁者不啻赤子之去其懷而投也于素  
所西邸延復東閣留作數十日歡無倦色二二入闈

實荷其力桃李不言朝露借恩英英白雲露彼菅茅  
隣斗極之輝邇天漢之潤葵藿心何日忘傾陽也耶  
及刺史濟南臬且轄于薊門也力剪銅馬泰岱地維  
幾缺復完當燕要害轉餉料兵一身兼蕭韓之任城  
下烽燧天柱能保無折侯豈不神武其威乃桐人聞  
之似以爲羽扇揮走者何也蓋習知侯之父母愷悌  
麟趾不殺抑孰知鳴琴堂上者可以運籌帷中乎桑  
陰撫雉者可以驅虎渡河乎我有田疇子產藝之與  
我有蝨賊岑君遏之豈二法乎惟侯星霆雨露全于  
吾桐注之故視二千石之與陪京三輔也直從吾桐



布之故迄今民頌南山士稱北斗也直從吾桐遍諭  
之今日者槃槃東山六旬燕喜而千里獻觴有桐人  
焉在東事告警方伯舊勲文武吉甫樞輔載登瓊珩  
朱芾擣醫無閭封狼居胥而從戎勒燕然碑有桐人  
焉在俾耆而艾老成謨猷流光尺籍而銀管紀德彤  
管紀勲有桐人焉在是青萍結綠長價薛卞固幸有  
吾侯而潘之桃萊之栢勿剪勿伐思比棠芡者侯亦  
幸有桐乎若夫政成三異才具五絕予悉之久矣于  
綸扉告歸之日諸門墻士知己之感貫心鏤骨命予  
不聿文之爲使君壽激浦徜徉尚念有樅溪病叟耶

李進士媳黃孺人八表敘代

壽受也昭顯朗融受于人孰若敦祇恭厚之受于天  
然仁者靜壽靜似于婦德爲饒何也男子生而四方  
四方者道德之周行功名之捷徑節義之磊砢多奇  
文章之巖壑競秀而亦智故險巇之羊腸孟門也惟  
婦德幽善受其晝夜閒善受其日月貞善受其四時  
故靜善受其百歲至壽若李孺人則尤婉孌曼絕後  
順有常坤道宜永者與蓋高門懿女爲名進士冢婦  
稱淑儷于心源公其婦于棋榛妻于蘋蘩母于九祖  
于飴布粟于閣之東館粲于塾之西錢穀于堂之北

者俱可閑有家矣乃所為翼子裕昆兩令器衿佩青  
青茲復孫枝秀出名譟膠庠行且芙蓉鏡下柳汁點  
衣非孺人辟纊中之斧藻乎位外者拮据與其旋有  
堂而構之樹之萱草而大椿襲蔭芝蘭助馨其忘憂  
宜與帝休瑤草等是若之享有化日者人之晚季若  
之太古人之漏刻若之歲年人之八十髦期若之侗  
乎未孩而孩笑之在提也浸假而期願詎足多哉翠  
華李君舊為連昏其子某復占鳳于孺人之女孫肺  
腑親謀前觴為壽而來問韻詞余讀史觀女則則介  
之推雋不疑歐陽二程之母不數數聞今孺人富壽  
子孫康寧好德誠不媿古名媛第使其孫若壻者介  
之節義雋之功名歐程之文章道德以為若母光并  
以光進士公之閭之楣也將受于天者還藉昭顯朗  
融以有傳歟

賀劉廣文榮薦敘 代

式觀經苑眇覲詞門炤籍者羅縷于臯比點翰者摛  
揆于油素文學誠颺舉已凡學之道師為難易日觀  
其生君子無咎記日多其訊言及于數周官太宰師  
以賢得民儒以道得民是德也言也政也不朽者三  
用以耦文而科者四也教敷半也劉先生雲漢為章



追琢而金玉之行將作人於四方然而孫志時敏固終始典于學之念也嚮讀其省闈魁詞春容大篇汪洋苑翰知必南州高士可風柙豫章楠榴杞梓而薪蕪之者名可聞身不可得見意丹崖百丈蔚蔚鄧林乎無何而郵筒聞矣思樂泮水其音昭昭矣夫解舉子之偕計于燕臺也猶靈物之隲龍門巢阿閣遊苑藪也彼泛泛黠額者紅尾青鬢且似初耳若國家而偶屈文章之士則鳳凰何必拘岐山而騏驎可使伍檣杪故先生以仕貧故俯從薦紳長者之請于冢宰大宗伯也遂丹穴我桐岡覽德輝而下之也槐風漸引落梅香斷一樹春屬杏花令振翎于似于長安杏花間伊時何時耶以昂霄跨壑之姿而斯須處此神雖王弗善也官先事士先志也雕蟲小技壯夫不爲唯文章爲經國大業不借良史之辭弗托飛馳之勢而聲名自傳于後誰其篝燈碗瀋鉛塹丹黃不停披不輟誦于制義者先生工也諸弟子謝弗若也掇春華復茹秋實貴豐玉復用饑穀夢嚙必擬射策暗中摸索都堪作天人三對于金華殿廷不啻綺絜如省闈魁詞者先生麗也諸弟子謝弗若也時或情隨年少醉因境多王衛軍云酒正自引人著勝地而牧豬



兒戲輒投之江山人伎倆亦能之弗齒先生之務專而選勝也諸弟子支謝弗若也將置先生于淡墨檀書之額而知其必玉筍最也隨置之鑿坡視草銓臺品藻之上而知其必金甌最也周官所謂得民謂獲上哉學然後入政綽綽乎兩易之哉而况乎爲安平望族無論名衙巍第之指不勝僂并有琴鶴夜告者講河汾者賢以貴積也宜先生之有冰雪風也斗大瞽宗子矜實冠乎江之迤北械樸而左右趨人盡循墻俯也故歷來師帥皆以爲鷹鷂不如鸞鳳曾無一搏噬我學宮者然安得人表如吾先生之與東流黃先生號黌中二聖耶吾先生名旣驚坐適諸監司多其友婚藉先生而轢則誰敢骫而婪則誰敢謫卽其不轢且婪也亦何關清白吏聲抑孰知所自許爲士先志者不在師不在吏而在金甌玉筍之間者耶語有之寧與鴻鵠比翼乎將與鷄鶩爭食乎夫是以公務畢舉私贍時及及坐春風如曝冬日矣且諸弟子更荷其有德者之言矣稚圭餘頰凜烈回煦雕龍文心吐蘅吐蕙直以其經術詞藝而華繁玉振之矣非先生之模則模範則範胡以能爲師然後能爲長又胡以秋闈當借鏡衡春宮必賜袍笏而茲之爲轄爲闌



並諸直指公僉書上上考予故于多士之間序而復之日和氏之璞美寶也待鑑識而後明毛嬙姣人也待香澤而後容周公大聖人待賢師而後通周衰而漢興鼎膠庠購丘墳雅重儒生貢舉士輒位至宰相則吾皖文翁之德之言之政之學之是賴著此四者其劉先生乎吾師乎吾師乎

汪母七袞壽敘

日之壽汪母七十也以其壽壽耶以其持壽之貞亨壽之裕者壽耶而未也月三日魄八日光蟾蜍體就穴鼻始明今指其蘇與茲時謂愈于臄臄也而遂盡望舒之暈乎蓋孺人之玉映陰兔輝也少翁之天孺人蟾蜍陽也令子若孫之盈盈隆隆孺人之圓璧重輪也子昔隣其廬聞孺人善待姑姑有祝云汝子孫孝當如汝且婢媵之微何當賴子乃仁下一如所息有撻者必誠之云若亦人子也何得以誓御芥之歲歉諸郎君議減田租之半孺人諭之云君子好行德快舉也盍益蠲之天高聽卑此數言者不已爲子若孫興福乎猶子中兩幼孤始爲代金桁繼爲代倉箱迄今得衣食妻孥皆母賜也家督有任老而傳焉然內事無纖鉅必親孟杼季緯七十載不倦勤至所被



宜則脫粟大布而已是孺人之教孝慈教勤約泰瑛  
之範可流三世李景讓母意固不在小富庶直視爲  
薄祚耄耄直視爲小年而徒以此祝鶴不几作負暄  
獻乎不觀今之森森竹立者長君雖逝二嗣不競爽  
乎仲雖晚遇綽有大成之風豐羽高飛何難扶搖而  
上乎季司田里曾一錢穀有遺策一言動有失律乎  
孫行十數輩不且人握隋珠个懷和璧乎投轄留飲  
則笑語卜夜兒侄出見則衣冠肅若朝典諸元愷文  
垓豎敵則神鋒各銳八戶則恂恂弱不勝衣問而知  
爲東海家則郝夫人之法也吾鄉無慶長至者君家  
于其日瓜祭祭畢集子姓盡歡冬爲氣始不忘物始  
而後來之俊忍忘祖德乎高于公之門列曾氏之鼎  
以奉板輿以錫金翹不日也于是有宗孫某帳秘董  
荀枕藏管鵬茹古嚼今搥天蹴地者舞彩前壽而母  
頷之于是有次孫某某亭亭直上羅羅清蹕二龍長  
途騏驎千里者舞綵前壽而母頷之于是有幼孫某  
某某五龍一門金友玉昆以及瑤環瑜珥蘭茁其芽  
者舞綵前壽而母頷之于是有通家子凌顏轅謝吐  
沈含任瓊筵坐花羽觴醉月時維月杪歲屬秋新仰  
視衡漢而歎曰遲之幾望桂闕其滿光乎則前舞爲



壽日遲之百齡桂庭其滿香乎此言不信有如皎月  
姚白也母夫人六奏敘代

是歲仲春四日姚母王孺人開六奏其嗣君甫歸自  
閩越友遍海內名碩矣何有一嘏詞而以問余謂孺  
人屬余母女弟行姨戚知至悉耳夫以孺人偶德翁  
叅藩之胄又中處金昆玉友間林接鳴珂床盈載笏  
翁胡以卷才折意甘柴車草服也余固知孺人之以  
恬退請也曰嬰兒時恐其傷於飽也巨室時恐其過  
於寵也然則優游絃堂翁足陶縱而胡以抗心希古  
自稚節至頽齡無日不慕樂公社劇孟家也余固知  
孺人之以義往勗也曰愛施者仁之端也恥辱者勇  
之决也然則淑儻踔絕何難朝徵鄉舉而翁且整身  
倦世竄端匿跡慎修所志守爾天符也余固知孺人  
之以善後期也曰先賤而終貴者和隋之珍也時聞  
而久章者君子之貞也以故翁宣義問嗣振華聲白  
也之在諸生鶴立群中鵠思雲外視通籍禁門直九  
萬之一搏耳至若駒孫三駿則尤渥洼神產後來愈  
奇追電逐星不問而知爲五花龍種矣蓋孺人儀操  
幽貞實凜冽有丈夫氣其母族世號儒林方幅齒遇  
方能于姊妹中鍾郝不相下而且托蘋蘩以賢著供



粉榆以孝聞則于和能畫荻亦應以聖善貴顯夫冠蓋舊里鍾石素儲而坐見遠滕簪纓升玉堂伏虛檻也則孺人之偶德翁已與其難兄弟媲美也而况乎神明之用健啖之步便視聽者注籌百年載彤千載之為名且壽耶余知之能無祝且頌耶

姚母項封孺人六表壽敘

代

逢壽如逢年豚蹄酒盃以祝甌窶汚邪徒襪襪耳地厚澤周豐隆大鼓挈貳長浦乃不言而八蜡順成然則姚渥翁之項孺人湘潭二天也而僅持里閭之祝祝乎令以子民其豈弟樂只曰眾母母眾于銅章黑

綬者人知之母眾於金翹紫帔者天知之有若南湘沃衍即翁茹蘂含冰貪泉覺爽藉有羶于閩以內王夷甫安能屢謝阿堵中而只喫湘江水不惹長沙泥之謠何嘖嘖耶女史箴曰靈鑑無象神聽無响飾性斧藻如孺人天不俾其宜民者受祿哉先是孺人父祖以舊閣敦詩禮堪與世裔潘揚渥翁雖叅藩公後時則童子食貧也相攸者奇厭統綺而覓啜晤擇對者奇脫統綺而親織紉常丙夜手指縑以佐下帷之漏箭焉翁豪鬱酣恣壁四立而北海傾尊南樓乘月不時有需倉卒乎在饋者在在矣投轄誠俠剉薦尤



賢矣始姑早逝奉王姑謹如奉舅迨舅又逝奉王姑  
謹如奉夫鼎養一如色養之時輿趨一如步趨之地  
孝終身淵至也家之阿大中郎列尊章行者五比屋  
通食馴德率諧睦嫺倍昔堂五幄寢而室一燭處也  
宜王姑之愛孺人甚於子息也再復才理鑑完識操  
鋒異湘有疑獄案山積矣上以試利器於筮任之初  
翁乃解迎刃於歸謀之頃覆盆徹渠魁殲交誦翁龍  
畷老子則孺人實神明之於官佐剗割乃能於臧獲  
主紀綱于官佐噢咻乃能於姻鄰主援拯于三收芹  
泮一閱棘闈而佐教事乃能于子教約教讓教之文  
章補造化而落上台至於扶櫬洞庭艱虞千里死不  
受憐於賻賙蕢殮飯含悉鬻珥貸錢以給乃能歸而  
持籌吝嗇近利市奇贏求田舍也偉哉六珈古所云  
丈夫女亦先生母歟獨渥翁壽民壽國不得壽其躬  
知必以黃耆駘背屬之閨閣何也峴山碑泪湘水祠  
顏大名已當大年矣孺人隱仁質天晦乃著久乃貞  
故七箸王杖屨便善病猶有少容彼蒼蒼者差以嵩  
岳呼酬滄海願歟六載奏最將馳封以在髮上指冠  
鐵矣翁未泊則知孺人必微于其嗣伯餼學宮仲名  
標幟郊祁並擬梁孟增稱憶嚮有門故當道一欲囑



兩君爲子衿一欲委千金爲請囑孺人俱却弗許每許其好客綽有父風意謂貴富可自致無俟優孟爲而門來車馬足兆充閭耳姚之世貴祖孫則先後兩叅藩昆弟則杭守與季孝廉父子則杭守與今晉江令今茲伯仲第去而兩孫旣具龍文餘孫稍需燕夢蟬聯圭組孺人直駢一門之祉鞵累葉之榮哉凡兩君總角交誼皆猶子綵酌獻觴希鞞鞠鬻且欲以舞斑代滕以望紫代日以抽黃儷白之句代口以屏錦代竹帛以丹漆代楮墨又以予嘗柱下史代彤管於水天蓋渥翁與子學同羶仕同版以深知代湘之巷

歌以深言代湘之廟祝抑孰知居高聽卑者久矣錫箕疇五福代予輩爲孺人壽耶

陳邑侯鐫課士錄敘代

文言乎時與古競矣時復與時競而泉露毫端分頭出穎煙雲帟上過眼成塵詮舊不奇格殊愈合惟趨時有華槁逢時乃有後先吳楚才得氣之昌者也桐子國距吳楚中江間其氣最備而魁名宦蹟絕一時氣又烟旻融泄而莫可迫視故神英鮮和文如春意魄沉猛文如夏而影致空洒骨脉老冽者如秋冬余不敏持此以相士前令湖湖士崛起今令桐而桐之



連翩第者與湖士多以經元寇南北非巧取于文捷  
得于時者哉縱之陽爲晉惜陰地余公餘百篋之閒  
日討諸士而課之則見文心各雕而四時具文彩又  
各各綴而一時新於以應國家之熾運聖天子踐祚  
之泰期總之爲舉子義穀中賺入之英雄才矣

賀劉學師秩滿敘

先生之司吾邑學也甫三歲而嘖嘖稱者若習之深  
而動之久余因以知氣類之蒸噓云桐人士濡毫吮  
墨寒檠夜帷特工苦爲計偕計聞先生之少負才試  
輒冠軍也而動其有魁岍自雄扼腕當世事慷慨鬚

眉颯爽則聞先生之壯心千里咄咄逼人而動其有  
機警迅發鑒識絕倫而韞之以敦固周慎訥訥若不  
出口無纖趨無詭步者聞先生之德慧之慧德而動  
風落谷鳴霧起礎潤邑弟子之聲氣於先生者道微  
而情捷矣一切學政如修頽剔蠹拔幽振乏則子衿  
輩實繁有稱卽余儕歷歷仕版皆且慕清誼高節而  
思紛紛梁肉之治國猶家端惟首藉之章程是式因  
以卜羶頭片地早裕經綸階此而郡縣而臺瑣而閣  
座國朝之異擢者曾有人繼而躡焉意所以愜輿論  
昭儒行者術不外此將撫黔赤如諸生披緋紫如廣



文時朝野之蒸蒸動端不殊桐人士也善乎直指之  
薦剡曰樹軌風生芹水先生之風其行已在惠夷之  
間與乃任尹之任如古秀才之任天下則斷斷自許  
許於人于以當軸借箸可耳彼坐春風者身薰炙於  
清明廣莫中草偃木榮芝蘭日馨頑懦薄鄙披拂更  
何如者宜其奉誦心勤必欲徵予言爲賀也若諸憲  
重之旌揚或比之淵藪比之金玉大之貴之不且窺  
先生底裡而與桃李門墻共成不言之蹊也哉故家  
彭沛而不言神堯之裔惟明經累世起家官雖冷然  
升斗藏不減陸大夫橐嬰鑠哉足祈黃耆壽曜必見  
之雲成五采之墟王爵者旦晚晉之秩三嗣君又各  
就鄉國學過都歷塊駒子當先老騏鞭矣茲厚徼于  
造物者誠厚乎芹水有盡稱之者閭春秋無已夫噫  
氣爲風龍虎一噓而畏佳之竅穴忽喁于唱于吹籟  
自鳴今茲嘖嘖聲蓋亦應求從類焉而莫能自已也  
故莫能自已與

刊方太恭人八袞壽言敘

方太恭人克女克婦克母克姑德克四福克五階可  
第一歷可逾百孫子可不億乃廷尉先生且欲其永  
世萬千也何以能千萬世曰坤道也坤貞故永靜故



貞如茲所稱幽閒貞靜地道光也然諸嘏詞中木天  
彤管花駟稜筆亦既備矣而先生復表章者何蓋吾  
人終日毋地而不知地今試問火寒水熱川流石立  
而曰此坤之靜貞莫解也非宋儒莫闡天地之奧非  
先生孰闡父母之光爰壽之木用告後人不匱錫類  
孝思維則與嬪則而俱永矣

聞不句物詠敘

不句與予蓋四世通家好居相比行相友驩相得也  
惟詩文兩隊志爲反而氣不爲降予妄謂讀不破萬  
卷不可語詩景掃不除萬卷不可語詩情乃力學卅  
年百家未十之一二氏未十之三六經未十之五子  
史詞賦未十之六七加以興隨境改事與年增讀未  
破而掃除云乎哉何如我不句之傾洒性靈以雋者  
古淡者玄踈者越也一刻韻言旣韻矣茲復以其芳  
韻擷芳於物抽黃儷白色聲香味時似似神蓋性靈  
故情靈景靈而物併靈矣旁睨予聳牙曲舌咯咯不  
出諸喉不狂自雄哉適予厭博而約嗜不句詩尤倍  
酒渴愛江清也不句於世醉醒怵閒皆敏圓祥整而  
書又無所不窺凡與胡漢章申申詈予者苦言藥也  
予拜已乃降已雖然千秋大業思議何窮卽如不句

義反山海經志博也予則欲取楞伽不生句之義意  
似進於是乎相視而笑莫逆於心當更有抗降千秋  
者在

宋進士元夫文敘

才學識劉子玄謂作史三長也文亦有之予再欲爐  
之以養謂養才則無陡來奔往之氣養學則無揚多  
汰少之迹養識則無荒入岐出之思也何論文之太  
全而應世之太偏耶茂才不秀秀才不大聲態中幾  
無才然制義焉有莊左矣博學不雅雅學不洽眼耳  
中几無學然制義焉有楊馬矣渺識不精精識不純  
魂影中幾無識然制義焉有董賈矣不過衝筆穎以  
爲時才染墨彩以爲時學拾帛塵以爲時識時轉文  
文轉時時文又轉時文於時文耳蓋功名時物也以  
時手餌時目時務也今主司文名者岩邑則怒去之  
偕邑則羞下之所來官師守令比比皆識時之俊傑  
也而况乎時平時乎半爲家鄉市宦有大力者所巧  
奪以與天地爭另有一星家之天輿家之地力大如  
竈以與予善憐才之天地爭而窮鄉單戶貧儒介士  
又安取才學識而爭之予之不第正坐此適遊六得  
元夫氏得其文而始知功名之易易也富貴利達還



以富貴利達之脉迎之先輩論文不外格氣詞理窃附會揣摩以富屬詞貴屬格利屬氣達屬理而元甫兼之譬諸畫然梅標恨瘦菊韻恨幽元夫則工胭脂牡丹者予且再欲其旃檀和帑餉蜜和墨雨露和筆不則有色無香恐又有如恨海棠者矣予渴欲應世萬死一靈求之文萬靈一靈求之時文乃元夫先獲我心更能轉法華毋爲法華轉讀之所謂月下嚼蘼本適口者珍今而後何必求吾才於詩賦樂府吾學於子史集書吾識于經藏語錄也哉新貴人一編枕之架之足矣且爲此亦甚暇也試檄一下索舊本頭便是紫薇張君房其餘夜杯晝碁春遊秋獵以謔藪爲玄塵以睡魔爲絳厨而已矣較之半跌自靜萬想俱清以爲養者不徒苦哉今而後使我有樂無疲者元夫命之矣

文天夢先生詩敘

畫奇龜馬字奇鳥虫經有六而奇窮矣獨詩可通且久變也蘇李奇變李杜變奇盧李孟樊變變之奇奇通且久者則又窮嗟難已生今欲與徐袁輩奪幟豎幟計無如疑鬼疑仙如吾師文天夢才者擬古沉而忽爲芙蓉露下楊柳月中感時肆而忽爲金華殿冠

天聖堂文集 卷之一  
帶鼎燹間體撮百勝名捨一尊矣天下何人不桓譚  
此草玄熱衷當問吾問奇者

朱蟬所夫婦雙壽敘

代

咸者恆之始也離者乾之綴也麟趾者關雎之應也  
言好逑也彼紫泥鳳誥昭獎高闈揚金門之徽旌玉  
牕之隱此予鑿坡時珥彤者也若夫採坊曲訪閨隅  
素門幽介輒作奇紀此予梓里時珥彤者也乃比鄰  
於城西杖几相接刀尺相聞則久矣夫臯伯通庶下  
有賢梁孟焉尋講朱陳於子從子某而其子壻俱與  
兒輩遊郡邑庠則重之以婚友矣用是知孝友之相

內外樂且孺矣其棗栗以甘之粉榆以滑之問燠寒  
搔痛癢者聲氣寧有二乎其衣無常主奴無定長割  
田宅分簪鈿也事後姑者且無好人之刺于以撫有  
兩弟又何羨戛之足云乎蓋蟬翁系自紫陽雖業雍  
樂而儒有舊風孺人周亦方幅齒遇用是資富能訓  
子姓容雅甚都不被捶而庭有甯越矣少伯伯子其  
素與據陶通貨坐致千鎰者乎今辟爲邑曹椽刀筆  
吏非漢人傑乎二仲俱茂才擬其補諸生不無今明  
之差次也總之二龍長途騏驎千里起家當上聞爵  
奚爭先後于階前咫尺地也耶而玉潤者姻也而珠



聯者孫也薦之皆廟堂器奚啻瑯琊於衡宇之焚楣也耶夫紫標黃榜之饒窺窬分毫者受之也而朱組瓊弁繖扇麾幢之榮則章甫縫掖受之也而喬羨榮期期願不老則黃髮兒齒善飲啖視聽者受之也蟬翁固六十有少容然聞周孺人昔善病及艾登耆子舍且欣爲天幸語有之天壽平格自旣天命遐齡厚祉桑榆非晚令伯子挾貲求郎二仲復礪發於賢書以克紹烈祖永康公之門緒也其時在七十老而傳乎令諸孫葦浮藻聯翩劓賈壘短劉墻竹素之園或徵靈於紫泥五色也其在耄期以在乎令今日逢泰階之平占狼垣之壽有一婺曜輝輝與處士星並永且令予丘園史氏得百年書笏珥彤紀素門之幽介也又何必鸞坡鶴禁之爲愈乎是爲敘

黃廣文榮薦敘

吾于學博黃先生而歎色目之域人也請肆言之周制命鄉論秀士升之司徒曰選士其歲貢人所由昉與及升之學升之司馬總惟旅師書孝友睦婣黨正書德行道藝凡具三物人盡賓興也賢良始漢文十五年建元初惟五經博士耳孝廉始元光之元然在學校總謂明經元朔五年始增弟子員補掌故縣令



續食次與計偕而學博乃重麻後召信臣以明經爲  
郎開經學甲科之始凡秀才異等名盡上聞也是方  
正文學之科也如黃先生者可策舉也隋置進士唐  
因之揚綰請置孝廉如今鄉貢制不果行然制舉加  
詩賦自綰始宋加經義及策是詞藻之科也如黃先  
生者可詔試也何生今而猶然青氈故物耶雲罷霧  
霽則龍蛇與螭螳同疾雷破山澍雨如霆則鷄暗于  
時而失其司晨也懷抱其一槩之操泯泯默默而無  
以試也今之士其無幸與雖然吾知先生之文之行  
之情矣材劇志大閱見襍博忽忽乎其心之堅空空

乎其志氣之遠也確乎其節之不痺就就乎其不肯  
自是鵠乎其不爲巧故也且聞諸邑之子衿也曰達  
師之教標然若秋雲之遠藹然若夏之靜雲鵬然若  
謫之靜使弟子休焉游焉肅焉嚴焉師哉師哉桐子  
之命也蓋師者帥也期而致使而往教之所期也一  
人服萬人從訓之所期也先生處家而諧處鄉而順  
德之藻矣禮樂之士榮官仁義之士貴際業已弱寇  
廩食年強仕而善鑄人矣何難秩官之吏哉楊伯起  
居講堂有三鱣爲三台法五十乃舉茂才位上公公  
孫弘六十餘以博士待詔金馬侯平津卽吾郡文翁



仁義好教化起蜀郡守招下縣子弟除更繇選學官  
僮子便坐受事出則諸生明經飭行者與俱今日者  
明經未復其身士賤官賤士慨想文翁久矣在三台  
如在鱸堂時仁義好教化爲賢長牧則春風力也若  
夫色目之科奚問焉且昔人優學博而劣進士曰三  
十老明經不已重之也哉

募賑粥敘

語云救荒無奇策予以爲果其救之策斯存矣周禮  
困窮倉城言豫儲耳李悝謂魏文侯謹觀歲上中下  
熟其策荒之始歟素弘羊置均輸以足國無關民焉

宣帝時常平倉始于耿壽昌隋及貞觀社倉義倉始  
于戴胄賑給其有額置歟乃未聞靳之穀而僅予之  
饋也賑飭寔出下策然而困窮倉城烏有已匪賑饋  
則無策無策之策卽謂之奇策也可且也大度支無  
策而司牧爲之策良司牧無策而素封爲之策比屋  
亦爲之策聚螯之腹含粟成丘太倉甘泉在衆嬰甌  
間耳陳陳相因飭粥之食寧有旣哉賑者振也史遷  
書平準則厭功利至傳貨殖則羞賤貧所望於振救  
何如而立文有云貧貧安振不能守正豈療饑之語  
耶抑予更有進焉聞之劉宴曰善治病者不使至危

天耳堂文集 卷之一  
三  
億善救災者不使至賑給賑給少則不足以活人活人多則國用缺此意在博施也博愛之謂仁仁人之言其利溥更何以愈策愈奇救度廣由旬乎言之心惻諸公卿君子當共成此慈航矣

### 戴巨卿五十敘

南雲之去北斗天咫耳今占候家謂壽曜獨南向諸日者謂爲南人卜年多過曆者其壽曜力耶故凡及艾服政者指使以往皆有耄耄期頤之望焉相率謀卮酒爲賀比之甘谷菊泉能壽人也然予獨不以此欣戴君巨卿故儒者兩仕齊知几案間事旋半刺名州夫陋例至今上粟馬多狙獐子赤拳走入燕肆寄洪厓于天官冢宰門陰與其曹掾市四攫先上粟馬者之金竊銅鎚以私肥造鐵船而暗渡小得一公舍幕府便魚肉所轄大飽曩時饑喙耳巨卿故儒者胡爲乎卑羞鷹鷂高慕鸞鳳遂刀犢而往徒琴鶴而歸乎漢崔駰孫寶輒自清矯晉顧榮少有珪璋机符朗徹俱以此秩能聲所稱水壺幕下綠水芙蓉得君而枳棘之司乃有芝草矣哉令投筆吏而盡清白爾爾也則卜式亦漢功臣我明如况鍾輩風操豈必滅楊震而選曹不幾如水群脂膏不稍脫之箕歛哉上壽



壽國壽民世俗所羨爲上中壽者無問焉飲菊泉而  
膚潤何如酌貪泉而神爽也元命苞日嘉置弧北指  
一大星爲老人治平則見見則王壽史記日狼北地  
有大星爲南極老人見則治安不見兵起巨卿官卽  
一命年僅五袞不且爲景星卿雲慶耶眠已之耄耋  
期願直坐享太平之餘景耳若其家無失則代有餘  
休三英器青霜紫電之光燁燁乎將蛟鳳騰起則家  
姪士儀其甥也能向諸姻貴哆張之子不敏謬居銓  
貳法嚴九品澄虛篤素刊浮名舉沉朴其素所自欣  
而并以欣戴君者惟此

祭文

祭姚大叅文

代

嗚呼萃凹夏迥瑞嵐蒼冥華胄地延吉人天挺世叅  
知政次宰相等公最鍾靈尼丘似頂朗懷溫肅春溪  
寒谷笑可噓花坐疑蹲木清慎勤忍孝友嫺睦爵齒  
德三德行藝六幼登庠膠書淫史飽朝之得人歲辛  
在卯在丑之辛旂常進身棘闈司鑑瑣闥紆綸瓦甌  
焚疏不祈沽譽殿上虎爭何如鳳翥從容回天不得  
則去名寇青瑣卿亞宜我外藩之選雖右實左公處  
晏然無不可可豪飲千鍾高臥三春醉不廢嚴秘閣

重封貂璫鼠狐燕冀蠅趨或勸駕日時平時乎公揮  
手謝吾鼎愛吾與在泥滓寧在孤蘆胡蒼大造善不  
慶報蚌老亡珠哀哉伯道心憂身推魂在爾孩爲爾  
林下爲爾泉臺寶樹未折蘭芽于藥苻堅謂朗千里  
駒血吾桃爾桃吾鬪爾鬪獨幹枝繁瓜綿自陔田荆  
旣諧阮竹何乖芝蘭玉樹欲在庭堦姪兮儁異箕裘  
克嗣掣風雷才捧日月志親如其親貴增其貴累葉  
馳封榮乎埏隧嗚呼名壽擅一身壽望七秩品維三  
仙品太乙匹貲緡萬億臣庶千百宦年三十里居半  
世功勒于廊澤潤于鄉欽乃內則治家猶國葭莖臆  
屬悉其芳躅以此吊公公首肯不令威化鶴楊震大  
雀薦以豆藿爲飲爲嚼

祭姚大叅文 其二

嗚呼天道其猶張弓高者抑之下者舉之其猶人世  
之有窮通而百通之故一窮之於吾姚公窮之者一  
時之不嗣而通之者令名萬載之無窮天故以其萬  
載者報其一時而又以吾萬人之口報其一人之躬  
蟬聯于叅藩景暘公之後以篤其宗祐鴈行于諸鼎  
貴之列以張其宗風岐嶷夙成以顯之于齷童試輒  
冠軍以顯之于學宮連第巍掇名職歷試以顯于朝



顯于楚顯于粵而因顯于桐于旂常則令其舞禮蹈  
樂以示工瑣閣則令其直聲傾海宇以表忠楚典闡  
則令其門皆桃李士可傳登庸之鉢粵叅藩則令其  
拂衣去超然于瘴烟瘴雨之外以考其終而又予以  
韓家阿宜杜氏阿買以繼斯螽英齡異姿青紫可立  
致何難乎恩綸之再賁于乃翁豈無由而襲祉抑大  
德之昭融公肅如秋烈如夏而元氣時冲卑如谷夷  
如陸而頌聞時崇戍削其骨烟晃其瞳而渾渾乎掩  
智閉聰賑人急則捐頂趾聞人過則付盲聾卜諸夢  
寐告諸蒼穹是以民食其惠君旌其功而神明亦鑒  
其衷雖嗇其所欠而已贏其所豐宜吾儕之不歌謠  
罷春杵者自哭于巷而公之凌紫烟騰丹谿者自徇  
祥于太空非控鶴于西之崆峒則虬于桑田滄海之  
東其歆吾芻酌酣然如昔以頹玉山於雲中

祭潘少司馬文

代

士有一定之論規矩不能方員鉤繩不能曲直故升  
降之于身猶條風之時麗也毀譽之于已猶蚤蚩之  
一過也衆口所加浮石沉木而莫明其是非者群邪  
誤之矣語曰以近知遠通于論者也以不平平其平  
也不平以不徵徵其徵也不徵此吾鄉所善觀吾潘

公者乎公方督撫功成其不啻樞府于燕而姑左右  
僕射于南者其知几乎而萋菲公者卽以督撫浙中  
功貝錦而罪之何也聞浙之跨有雲霧金堂山也公  
爲力止開採而一則接壤江閩民俱安堵也功吾圍  
耶功隣封耶一則對峙日本而島無驚波也功吾華  
耶功瀕海耶且素貯戇章屢糾璫豎載在白簡卽于  
浙亦嘗水火北司也功一官耶功生平耶于陽城唐  
垆之偶激則多之于張禹王旦之偶隨則奪之史何  
其少平也在漢黨錮張儉實激成之而望門投止破  
家相容何其寬于議罪陳仲弓于覽則密持教還從

外白署于讓獨吊焉而鄉論未怪其非舉何其寬于  
議功許襄毅緩持逆瑾忠無擊排而終以譽命吾公  
事禁太甚晦韓偓之衷泯韋澳之跡陰養和平令吾  
鄉不至爲汝南郡之鉤舉其被德不已幸哉元禎之  
諂附無憑楊時之交通非玷何至今日而莫能以黃  
山之變徵浙之功以公之功平公之無罪也此吾鄉  
之以不徵徵以不平平而登丘不以爲修處卑不以  
爲短不以康爲譽不以歉爲悲新而不朗久而不渝  
者乎且太丘長化先鄉閭爭訟輒求判正卒時海內  
赴者三萬餘制衰麻者百數子名賢致輝星漢而許



靈寶尤奕葉尊主組公家稱高陽里久矣餘榮必得  
之于其嗣而餘愛又能得之于鄉也口有碑可鐫白  
珉矣心有旌可銘丹旒矣執紼嚙詞神之聽之尚饗

祭余母廉憲公姪婦文

代

嗚呼勁秋推斥兮炎凄代爭歎氣逢渤兮朱零憤盈  
西顛沆蕩兮颺戾匄訇呵嗽掩鬱兮霖瀝如傾列宿  
投縛兮長河韜晶宜婺徽之曠莽兮露晷黯其無光  
愁氛結于衡街兮瑞嵐散于石滂信一氣有餘烈兮  
朱明殺而白藏無膏夏與紫芝兮山澤盡于寒商獨  
太孺人之秋零兮儼蓮房之墜粉退則蘋蘩葶苳兮

進而粉榆苴莖外則剉薦捐鬢兮內而絲麻泉緼惠  
風佇其芳香兮淤泥濯而莫近洎孀單而健爽兮老  
圃菊其晚佳象服正宜冠帔兮胡以丹旒而奪其青  
縞嗚呼岡陵兮綿綿山河兮雍雍穀菽兮陳陳蘭桂  
兮重重故長公之賓于鄉也世其德次公之翁于家  
也世其業諸孫之七劉五董也能世其廉訪之宗而  
今之飛鳴郡庠者能投三年之席帽博一日之綸封  
以俟鸞坡供奉之紀其貞靜於松幽閒於蓉而余葭  
葦小子第知因時動歐陽之悲占天知安道之殞存  
愛東海之則沒思北堂之丰又烏知夫濼靈彷徨之



五玉堂文集 卷之二  
三  
爲白鶴兮爲蒼龍抑或餐玉液乎齧芝華兮其余一  
豆一鼎之爲朝饗

祭蔣子卿母夫人文 代

嗚呼母子卿者而不及見其母僚庶也嗟乎子卿能  
不悲哉化兒顛美功名富壽悉聽柄持惟胸腕才神  
力自揚舉吾邑石才子卿幾斗其半以母稟劉太孺  
人之淑訓於廷尉公尤有兄風女稱博士得鳳毛子  
而文章娛戲足助金石擊撞斑斕喜可知也劫來胸  
腕由我口眼在人子卿試牘奇放名大夫御史置轍  
高等而冬烘則失之闈中三釜未仕後三千鍾而養

不洎矣母幼蟬嗜籤軸是宜鳳帟五色中奎畫標其  
漢籍摘文著其胡笳而今喁喁諸小子之讚歎矣晚  
復龍聽瞿曇又宜摩珠五色中尼藍婆獲其家古槃茶  
守其界而今奄奄以疾捐館矣嗚呼傷已乃余輩情  
同遶膝則知其疑然者鸞停鵠峙也飄然者玄裳縞  
衣者鶴也介然乎松性筠心靜芬响也澄然乎萬壑  
清冰蕩囂埃也遙儼霜飈而近挹慶霄也旦晚於絲  
枲也春秋于蘋藻也生平于堇荼蕭艾也倉卒於西  
席師東關友也其相夫子於下帷則曰一品儒千金  
字也相于戲下則曰百夫長萬人敵也子甫髫而諸



生則幸其拔叢菁也寇而食餼則與其染鍾鼎也某  
試稍殿某試必前舊且冠軍栢臺則意其似舅卽賢  
明年第芙蓉鏡下也竟爲此創距而遲乃封詔耶則  
異日鳳帟五色中第能潤子史仙梵之色若姆儀嬪  
則非予小子言能佐摛文堂之綺粲耶則今之椒漿  
蕙肴不爲三鸞九醞之寵錫者先耶

祭倪孝廉夫人文

代

帝子雲章星石機忙君娥霓裳月波杵忙故靈藥蚤  
奔于兔闕仙槎冥返于鵲梁胡然而下誕于江鄉謂  
貪烟嵐之窟誤認霄漢之方胡然而出於名閥歸於

華堂謂今司馬傳說之精胡不可爲父王今太僕台  
位排三太史奎垣聚五胡不可爲尊嫜且新貴人之  
六宿文昌而胡不可以爲郎雖所處者金碧爲屋檀  
麝爲廊而所嚮者銀露之壇瓊葉之室清虛之房故  
其容無驕穉體不靚粧脫錦佩兮魚鱗衣解珠纓兮  
明月璫而江籬爲扈薜荔爲纓沆瀣爲食瀟湘爲漿  
既有內美又重之以修能兮昭質未虧雜揉乎澤之  
與芳信姘以練要兮閨中玉秀林下風香無何而斗  
翁搜玉錄金母檢瓊箱謂飛瓊夜失雙成孤行至今  
瑤池不碧絳桃無光乃韜長河之映收婺曜之芒而

升平堂文集 卷之二  
招弄玉兮鶴翺翔留蕭史兮吹鳳凰復遺天孫一女  
以儷鴛鴦則孺人之弱息庶幾尾箕婦女之長而予  
之冢孫敢云牛女夫婦之良惟有俟新貴人之懸銀  
艾光緋黃焚帛冠而下拜望雲步於蒼茫儼昌容而  
練色笑黯然者魂傷彼自樂蓬瀛乎蔚藍又胡爲乎  
霑余襟之浪浪

祭方母趙太恭人文

太恭人生泱泱儲晶太恭人逝必遊壺瀛胡以知之  
福與德并江南北坼理學孤鳴我師明善孰助克明  
厥基崇實孰助克誠五星奎運天開周程室有張邵

唱和相成宜爾令嗣荷薪道盟宜爾累葉位祿壽名  
父二千石開府之兄子卿九棘蘭臺柱檠仲魁南宮  
粉署郎清季餼學宮白璧雙傾伯也遐祉遶膝簪纓  
西樞節鉞左轄琬珩孫枝競秀庭階玉盈堯螯蛸蟬  
人可登閎才馳垣翰爰有女英秋風起鶚似舅有甥  
斑襴四匝紫帔三縈科第八見貢薦一呈九十壽考  
九十欣榮千秋彤管百歲丹旌所少唯仙今乃騎鯨  
或駮鸞鶴以吹緹笙或憺壽宮繚以杜蘅蘼蕪堂下  
綠葉青莖招魂弟子沈寥愴情質經伊昔鐸音鑑旬  
靈皇皇降寂豈無聲玄言秘籙告我九京



祭方廷尉公文

代

方野同公羣謚文孝道順于倫學半爲教文開濂溪  
奎垣星五不在茲乎濂溪皖土孝者畜也取其不忘  
七十墓廬孩赤耄蒼移忠移治克施有政豸繡三廵  
而廷尉平邦之司直舍命不渝麗澤講習好爵再孚  
崇實荷薪火傳明善心蒞性燈五色雲煉名儼鄒馮  
江陝鼎立觀乎人文離烜賁熠廟享時思死事哀惻  
先君子祠春秋不忒某爲國致祀奉牲其間公會周  
宰胙拜天顏母也罔極卜兆厝之兔隨板屋鶴護蘿  
帷血濺栢枯二年化碧大孝終身經衣易簣夜驚櫪

馬言殞者星騎箕尾去尚有典刑世家鮮禮祿非不  
朽有基無壞樂乃能久立德言功三世琬琰尚墜榮  
令輝增玉檢慕亭遺墓孝河汨長理窟詞源文正堪  
兩梁曰貞白荀曰文中小史賜謚詢謀僉同誅自此  
始令聞不已從祀先公又何之矣

祭何吏部封翁公

代

維公鼎族流徽則玉田而珠圃也乃英美孤寡弗階  
門地則芝根而醴源也自初衣至服寵如粟如羊不  
入則清泉白石而素絲純也安知鳳凰德所貴來見  
希則卅崖青壁而奇木蓊也馨夕膳潔晨餐兄蕙茂

弟蘭發則孝義冷然善也暢飛暢舞氣流芳追念三  
五大綺黃則田園悠然樂也蓋桐固宦數舊猶少簿  
世之司公之子若弟一二歲間遞居銓管而且方  
伯耀昔柱國爍今也則昌寓之世貴也選部公雖早  
第而昆季之者鳳毛方騰于橋門驥足又展于州郡  
第五之名豈減驃騎三圭三貂猶擢之也則尚之之  
後芳也柴車鹿巾與宮保伯氏同一譽操則子哲之  
市隱也茹清食靜復與贈宮保公同一壽善也則叔  
度之庭範也及此而玉燕投懷石麟摩頂其娟好韻  
秀者則駿子而駒孫也嗣此而賜徘徊赤耳車贈扶  
搖青鱗蓋過墟墓而下馬者則馬鬣而龍耳也獨如  
邑人士之歌松雲唱薤露者則意其窀穸也乃生等  
之陳蕙肴酌桂漿者則意其輜輶也家通莖榜則講  
于孔李也官授芹宮則衡于山左也蕪詞可悲則槐  
風凄而駟馬已駐也蔬奠可歆則荔日綸而大鳥將  
步也

### 祭夏母文

崑崙西陲聞有瑤池金天宿海王母攸宜乘雲來翔  
嵐光微熹飛閣綠山咏簷臨陴人寰仙宇居亦西之  
玄霜厲其性絳雪潔其姿水之紺桃之碧三千年花



三千年實美其境而壽其期爲孝廉公淑配爲清白  
吏賢姬兩芟履地莫不仰棠蔭而去去思思願令君  
銓諫願令君期願乃令君已逝則願之如山如河之  
母儀今母儀又逝則有佳哉鬱鬱葱葱芝蘭玉樹之  
離離始羨華封人祝惟一多男子更可愈出而愈奇  
質則南金東箭志則風翮水鬢弱挺秀容紛此孫枝  
閨玉蘭澤喜溢其楣三年衰絰佩而礪鐫十年艸角  
繫而纓綉紆朱拖紫拜塚纍纍舊時郎秩晉階越差  
吾不知孺人之含笑者幾而加頷者誰某等爲金蘭  
爲女絲于嗣君同墳篋奉孺人同鼎彝固知其生無  
憾沒不悲升天梁叫帝闈駟白鶴馭玄螭返崑崙若  
康馘青鸞音黃竹詞鳴雲璈進霞卮交黎火棗何如  
藿葵人間酒脯眠若木芝丹臺玉室爲我遲遲飲耶  
啖耶曰未可知

祭溧陽鮑餘菴文

代

鹿筵秋爽鴈塔春深同年之面異日之心唯某與兄  
聯輝蓋榜誼通家云倍一而兩名不魁額官不木天  
同嗟草草假而南旋寇發青齊人行刀縫伯桃角哀  
性命與其乃投年雅予邑侯陳護之出境北道主人  
予伏苦塊遠致唁詞起宦閩浙先君舊治君宦燕京

登仙何異念予盤錯稱予利器丁卯之晉白下相將  
惠而好我高山景行筮仕比曹度支爭詫借鎮兵曹  
威傾僕射粉署徽郎最榮銓藻虛左山公惜哉乎天  
帝曰臣哉宜藏金甌天曰隣哉宜藏玉樓玉樓可去  
家亦可寧不念蘭閨盍念椿庭兒爲兄哀兄無兒慮  
奇玉自珍愛何必助况有季豹與予夙好澤霧昂霄  
咸避二鮑家弟才名兄佩袋內花萼各芳同年再倍  
獨兄與予白下遂訣三載書音一朝泪血生死合離  
始終二午鹿鳴舊鄉可憐蒿土請勿作仙朝有瀛洲  
請勿貪佛心有慧舟南都佳麗靈其再來以閣勝館  
以元勝魁快否快否以侑以妥絮酒炙鷄鮑子知我  
尚饗

祭吳誠菴文

士之誄自縣賁父始卽顏延之所謂實以誄華苟允  
德義貴賤奚算焉意也而今權鈞王謝或沾衣於西  
州賢如樂任鮮漬酒於東粵非吾輩輓吾翁意也文  
賦曰詠世德之駿烈誦先人之清芬旣投篇而援筆  
聊宣之乎斯文此吾輩奠吳翁以章而誦詠之云翁  
系延陵家寨山以世焉中葉多鵲起清芬駿烈有攸  
來及翁蓄長益貨禮生於有歲不虛馬融之帳以處



師月不虛陳遵之轄以處客其破韋氏之籬不虛日和柳氏之丸不虛夜也以期二惠競爽之亢其宗季子偕阿大並諸生而早折嗚呼有吳延陵季子竟天且斬哉然則翁好賚予皆阿大縱出入以快之翁好受享皆阿大伺左右以歡之翁好釋阿大爲之心皈持事齋祓翁好儒阿大爲之衣冠中動作慎行且席珍以聘也夫靡顏膩理哆嗚頤頰形之異也而翁已無勞而形聞言如響智昏菽麥神之辨也而翁已無敝而神朝華夕秀鵠鶴千歲年之殊也而翁年已七十老而傳所未愜者青紫朱丹耳大抵翁所食有期頤之數十之七履豐臨泰之遇亦十之七寬樂令終之祉亦十之七以其七坐收之大化以其三立補之後人可以數載後之貽笑于蒿里者貽笑于今也

祭方唐山先生文

嗚呼修榮短戚者生數乎伸暢縮抑者生趣乎乃如君之純終領聞則不朽如生者乎卒之日僉謂富貴壽善萃君庭靄焉英英有不凡子五文雄者三尺帛之徵清華伊邇亞子將取肘後印小者又讀書瑯瑯克昌厥嗣誦德攸歸其實吾儕最知之最道之也君生而有伊洛遜講昆季俱以孝友先惟君於人無間

言爲能克其家聲而捐軀負父於舟岍雖股禱母疾  
輒痊特以異稱也伯氏李官時幾欲代輸粟爲之起  
家雖三辭然心德伯氏不須臾忘愛好依然一如  
其待仲氏兄者婚友緩急凡民有喪偕其封御史公  
爲范氏麥舟風是業有人焉骨而月之寧少耳而目  
之者乎吾儕之所心繫非第是耳五十九年來自成  
童遂以諸生廩相終始無間其七投棘闈灑灑千章  
者足惜且淹雅乎竺乾柱下幽而星輿風鳥怪而鳧  
毛龍鮓詩古文詞直易易焉嗚呼屋梁落月尚能見  
乎空梁落燕尚能詠乎鄴侯之架能攤書無太冲之  
壁能題句無客舍乎尚能呼盧王門乎尚能吹竽憶  
君之垂裾真吾儒憶君之揚鬚烈丈夫丈夫無泪爲  
君眼枯壯士無病爲君體癯友朋無服爲君素車白  
馬輓紼以歌烏烏歌曰君家兄弟不可當列卿御史  
尚書郎况諸郎君之斌斌文武皆將相材乎蓋有先  
君子之明道存仁故簪冠次起有君之繼志述事何  
難家三戟而人萬石乎行見廷尉之復大其門而郎  
署多見于列宿間矣於吾君處士星不大相輝耀耶  
尚饗

祭陳茂才文



嗚呼生浮死休翁其休于渾沌之央泰壹之野收視  
息智與古人遊耶亦且蕩志攄懷軼埃壻登霄嶠樂  
而忘人間世耶胡以知其然也知翁之有抱朴無賈  
憾也生而未行家慶早失鵲鴒多難堂構播穫不無  
愧于厥考翁則吊三兄之不咸予手拮据復舊物而  
益光大之能以爲弟者爲子矣猶見或有窘蠹則教  
先而率謹商虞其業農女其資而笄者爲備笥裳以  
歸焉能以爲弟者爲叔矣于是田里殷賑累葉素封  
諸嗣復仰花萼之義和樂且孺是又以能爲弟者爲  
父而不啻爾也封胡羯末四秀俱有鳳毛一喙先鳴  
一鷄繼起梧桐孫枝又將有高岡之喈喈焉其光大  
乃後者肯構肯穫倍崇弘矣然翁生前之檢押者足  
當之撫挹者足受之卽綸章賁敷榮及埏隧其寵辱  
不驚之靈一怡衍于瑤水鴻天而已何憾於歸全而  
煩此哀此爲耶豈吾儕紉江蘼以爲纓侑水之一注  
而不獲翁靈之一嚼耶

### 祭童育之文

育之不乎君死誰存死或解尸存者愴魂愴魂謂何  
謂天昏昏生人一脉元氣渾敦渾敦而死不如斲元  
天耳可提吾舌難捫問天於家必曰孝友問天於世



必曰忠厚請一一稱蒼蒼聽否父課能讀父劊能守  
孝大尊親勞養乃後况父艱虞十代八九况奉菽帛  
如奉今母邇來頓陶月骨皆假親喪因急問富數馬  
其于足手財多義寡萬一薛包君庶幾者異乳一孤  
孱孱弱植提弄愛之如其弱息調其危匱督其楮墨  
爲藝苑資伊誰之力邇來崔盧望之肩脇卵下除書  
寅投候帖君若罔聞非狂非俠曉無士夫面不臣妾  
邇來桓文人爭用霸赤白雙探電霆一咤縱難彈人  
豈不懾下勿向君言心貌俱罷邇來蘇張以爲談鋒  
咄咄在口寧受愚容富易無驕百尚有幾邇來杞檜

錢神偏鬼宜可染君本質則匪凡此皆忠所難厚事  
無情有情不薄卽是天如日誑衆口皆然如日實狀  
胡靳以年如日溫肥其少亦微刻刻飲啖刻刻噓歛  
必貧乃壽才豈療饑彼紈袴子尚多金緋胡畏朱門  
胡欺布衣畏彼機辨豈遂鑿空照舊鏡日摧以輪風  
而乃摧君誰肯恠伺畏彼勢勇豈遂奪曆而乃奪君  
誰肯勅惕吾知天矣代勿啟齒兄及之弟父積之子  
長旣珪璋幼復簞簞報乃克儉倉箱自累報乃克勤  
闕閣自起男壽康吉報且無紀芳骨猶香謫薄已死  
仔細思量奸雄到此嗚呼痛哉知己知君君知知己



一字千山一泪萬水哭君何以吊君爾爾芻酌倘喜  
天問卽止

祭潘篤如茂才文

代

嗚呼鄉與朝有不相稽者史載筆或不及採而丘里  
能評焉吾邑嚮以吊家司馬也鄉與鄉有足相模者  
士載言或不及採而昆裔能評焉吾族今以吊家篤  
翁也孝友者吾世政乎清白者吾世聲乎詩禮者吾  
世統乎至于翁而二人有懷兄弟式好也先人敝廬  
足庇風雨長枕被共處焉無或有不咸以爲棠棣羞  
倉篋之司絲粒惟伯兄是聽若幼弟孤姪之玉成則

織悉引爲翁任焉其介性不淄僅以筆硯未耜望一  
嗣以逢年也胡至今而世政尚未大施聲未大播而  
統亦未大垂耶則亢宗實有二嗣焉在可與家司馬  
聯行而比翼者乎是何也嗣君俱早登作者壇邑弟  
子爭讓鞭弭于中原而復寒氊夜帷無他嗜好耽耽  
焉于鴻鵠千里而廓然不爲叩盆拊甕之學也亢宗  
可兩族焉而况諸孫之振翎方起乎河以委蛇故能  
遠山以凌遲故能高德以純厚故能豪然則二嗣猶  
將乘德報之所易而翁則實開德積之所難耳惟今  
勢利兩窟言之色飛雖真男子不覺生平寶鼎盡喪

天耳堂文集卷之三  
焉翁逾三旬而衿士後亦大器未登所需親故貴人  
寧不有力屢屢高軒過而不得其一刺爲來以視時  
之望門投拜者何如也卽家司馬白簡披章過觸疆  
禦而竟以不白坐之貞亦有然者矣尤有難者君子  
好行其德豈所望于士之甚貧而賻葬助娶善狀可  
數百十指也茲時固多昏眊朽蠹者曾有翁寸腸熱  
血耶昔家司馬宦橐蕭然悉推以潤九里而澤三族  
也惠亦有然者矣夫華陽謚貞由其門也柳下謚惠  
由其室也公叔文子之貞惠由擬議焉吾族卽以此  
擬翁與司馬奚歎耶是又何也翁與司馬幼同學同  
蘭臭司馬屬纊時甚念翁翁亦當幸九原有逍遙侶  
蒿里卽竹林耶而且誦德有宗哲紹聞衣德有子孫  
賢盛焉翁自以爲是可吊耶亦何必吊也耶尚饗

祭潘念吾文

稽古鄉大夫飲國中賢者率其吏與其衆以禮賓之  
凡三年興賢能州長習射黨正祭蜡悉舉是焉義取  
經天地紀日月參三光而且日三賓者禮之大參也  
重何如而可令車馬載駟鐘鼓樂鸚乎序賓以賢衆  
莫潘翁若也遙遙華胄甲于歙州鷓鴣一枝借江之  
北移楷他山之石而易生於聖鄉性相正也鄭之刀



宋之斤魯之削吳越之劍遷易其地而弗能爲良惟  
翁世德在歛而金輝在桐而玉映奚啻荆璆趙璧四  
方爭寶耶故見素抱璞砥礪廉隅濯足振衣所云喻  
青雲之流霞飲若木之露英者聲如歛周才偏智英  
峙俊邁被服儒術所云吸飛泉之潤液懷琬琰之華  
章者聲如歛教子鴻生鳳翰龍雛東觀高才所云佩  
蒼龍之蚴虬帶隱虹之委蛇曳彗星之皓旰撫朱雀  
與鷄鷄者聲如歛某等鄰桑梓戚葭葦交復蘭茝意  
其德音眉壽介爾昭明而少微夜殞處士云亾其視  
挹八玉御三雲茹芝鍊玉今此之樂有仙與向之濟  
肺啐酒飲于瞽宗者一矣仰不愧矣其視祀五鼎養  
千鐘珥蟬鳴玉後此之樂有子與今之椒糝桂漿飲  
于里戚者一矣俯不忤矣

祭方克壯文

代

嗚呼庸庸託生智人託死生託以身死託以子克壯  
名闕託姻者何口開未幾目瞑無多鳥啼不語以默  
能聲慘秋戰氣雲馬風兵怒雨騰烟恨花捲絮醉鄉  
蒼茫無有是處君醉天漿南箕北斗夢幻電光白衣  
蒼狗其視下也鬪蝸易散紫荆庭前黃梁公案每有  
良朋莫如兄弟星合參辰源同沱澧花萼相輝機雲



友篤雲間霍暎一斷一續神助謝庭池塘春草玉樹  
芝蘭安玄並好有子事足蛻而遊仙東飛化鶴西飛  
化鵲請來故居在榭在桷屈戍金鋪流蘇翠幄請來  
故墟膏腴彌望滿篝堪祝三釜足養請理牙籌紫標  
盈間惜乎晏子納楹未書請理瑤編青緗充廬惜乎  
韋賢一經未授桂林一枝三十六載同年有樹人亾  
物在絕交掃軌門杜一開今茲吊者昔所懷來歌風  
酣月夜錯觥籌今茲誅者昔所唱酬時作大言坤輿  
乾蓋今茲託者詩前酒外託申片言意中萬億以是  
藐孤辱在荀息玉墀映水潘楊世講老我泰峰清非  
樂廣女二洵粲先後及笄呱呱抱泣草木爲妻客拜  
無答或踊或踟杖餘半竹經餘半麻閨閤韶齡隻鸞  
在鏡鸞影鏡憐君心鏡映天下最傷兒孤婦寡屬續  
此言魂吞夢寫况爾慈幃反哺需烏纔侍母寡又見  
孫孤太上榮親志壯未伸其次能養聖善悲辛璧月  
輝輝玉露霏霏英雄指日君覺星微朝吸木蘭菊英  
夕飡蓴鱸地美君覺天酸生願人揖死願人泣哭君  
紛紛泪枯情濕况爾友婚遺託猶存披肝當泪刻骨  
成恩薦君一茗俟孤五鼎摩孤之頂君當日瞑尚饗

祭方克壯文

其二代潘阮壻作



子兩子壻嘗臥遊泰岱經丈人峰若有人兮山之阿  
招與語而泣且訣也予固知嶽公之不死也其乘鸞  
忽馳虛無風飡委松宿雲臥恣天行靈矯遐舉於洞  
天耶胡不芸局石室不羽駕鸞車茹芝鍊玉驟白獸  
于商風御蒼龍于景雲耶知公之魂魄京寰朝登金  
虎夕步文昌銀黃三組服寵於名高富厚之間者不  
死也其火宅晨涼重昏夜晚祥河踈疊澗慧日皎重  
輪歸真息假於梵天耶胡不銀城貝闕不兔林鹿苑  
日映金雲風搖銀章靈城偃色空衣滅影耶知公之  
魂魄畝宮飛楹走拱星錯波砌白雲親舍玉胎珠樹

常嫌玳瑁孤猶羨鴛鴦偶著存于北堂婦子之間者  
不死也然胡以愁氛油裔虹貫日白經天列宿掩縹  
長河韜映草木爲震山川動色豈秋之噫氣耶知公  
之目裂背髮上指冠撫膺扼吭者三仰天搥心而泣  
血者魂魄於商丘大夏卯酉參辰者不死也噫嘻夢  
耶疇昔之夜招與語而泣且訣者嶽公也耶焉得諉  
草言樹之背帝休瑤草其忘憂等白華南陔養其已  
矣門閭望絕轉貽忘憂者憂凡有親者能恻然西河  
之痛耶德音莫違及爾同死菟絲女蘿引蔓欲長藤  
蕪忽分莖稜空引凡有室者能恻然蘭澤之悲耶陟



彼岫兮瞻望父兮黃金滿籬未教一經無父何怙凡  
有子者能恣然蓼莪之痛耶兄瓊芳而蕙茂弟蘭發  
而玉暉試吟青玉案莫帶紫羅囊謝門之育芝蘭者  
不猶望之今耶噫嘻夢耶醒耶疇昔之夜招與語而  
泣且訣者非岳公也耶其果行光容裔旌拂霄嶠軌  
出蒼垠鷲嶽香城金乘珠藏丈人峰其超超情塵愛  
流之表耶噫嘻醒耶夢耶繼此之夜招與語而泣且  
訣者猶然岳公也耶

祭廬江張氏文

代

弱翰風升柔鱗浪騰幽熾之質匪揚舉焉莫與興所  
可揚舉莫如吾賢哉之孫女甥其處也爲桐子之女  
則而其適也爲潛溪之婦刑以其處于世胄適于顯  
門且爲玉映之清新謂宜安食舊德胡爲乎茹蓼以  
含辛蘭閨失恃而寄撫涓陽則舅借母倫頻值兵燹  
而早就尊章則女借婦名甫成童而偕儷謂宜蘭澤  
永茂胡爲乎蒲柳之先零問其捐瘠之故豈舉家所  
忍見而至戚之所忍聞賦懷洛神詩夢湘靈步襪兮  
凌波一碧鼓瑟兮江上峰青蓋水爲氣妃而顛顛立  
冥玉山瑤池坐有飛瓊鸞笙之侍者雙成是謂金母  
以并木公之仁胡爲乎殮雖歸於木土而凶非折于



水金聞玉漿之九轉與神鼎之七明龍泥印玉策天  
火煉真文其仙耶當在祝融之赤精其梵耶陰法雲  
於真際則火宅晨涼曜慧日於通衢則重昏夜曉當  
知三車之非喻而化城之卽真何以捐瘞突如其焚  
茶毗兮屍委華屋而神遊於鹿苑鶴林薄汚薄瀚歸  
寧無親枯椽口澤承祀無人葛藟有本蒹葭遞縈視  
男女子皆子而內外孫皆孫吾家好梵請登火宅之  
上乘哭且唄兮薦以妙法蓮經

書

寄南博士成公書 陝進士

秣陵屬秦王氣故人今光怪其間爲吾秦流星劍氣  
矣向得就拭赤土幸竊謂千里之合乃竟遙遙龍寶  
恨不卽刻舟求之秋半過伯氏當相尋於壁門橋外  
何減延平水濱先遣候人于斗牛此亦張家之豐城  
令耳

寄葉庶子書

陽月二之日就館穀于蓼聞老師北上愧連歲羈孤  
送勞俱缺罪擢髮不盡然心旌遙遙夢繞烟霜道左  
也榮登宮端台階在望其念問奇舊弟子力鋤經園  
萬一可預立文而候巴相視齒牙及之乎駑駘何敢

望追雲伏阜可鹽車可但得孫陽一顧骨亦千金耳  
小刻蒙玄晏遂叨時賞俚文行將就梓再懇弁言幸  
爲長價邇傳王明初老師權于杭西湖詩料江山助  
人不禁神往况蒙生不幸壁立罌空赤洗到骨貧貧  
妄振不能守正升斗求活非恩知如吾師而誰耶初  
補庠時王老師知新進之貧獨破格沾被蒙以餬口  
四方差數稍減此行不無奢望諸鄉紳或有荐剡更  
祈老師一言千百宛悉揄揚使寒生有微利而無開  
罪足矣

侯阮澹宇先生書

不肖舊名卜自更名來未通一刺蓋寇焚敝廬寄羶  
六蓼鱗鴻少便耳當今真儒偃蹇高宦沉淪使皖上  
無鉅宗鳳凰不復遊岐山而麒麟皆爲檣杌矣客歲  
聞有詔遇草茅望切雲霓向雖踈外門墻然瞻旻就  
靄情有甚于立雪者彼夫入室操戈飲泉而忘所自  
其挾纊而忘所從煖不知其具何等肺腸也不肖介  
而俠壯且堅自謂瀟海意氣可以千古每睨窺台意  
噓蒙振枯誠千古一先達雲泥或相針芥耳言及此  
拊膺長歎者再柱下其猶龍乎若他者吾知其能飛  
能走而已邇以窮愁著書伏櫪有志文艷進或能工



累藁數種擬附青雲乞立晏一言爲重乙亥歲曾許  
咳唾而今乃承九天珠玉也試期非遙抵皖趨教值  
某生行次呵筆顛忙誼薄雲天慕言曷罄

上何文端相國書

代通庠

蔡文宗客冬徵試新正揭案貴池懷寧科額各增而  
桐仍舊額時尚未知師相之秉國也及聞邸報童叟  
歡呼士紳揚頌乃吾儕子衿則別有望於舞蹈之餘  
者皖江數百年來始豎黃扉可謂盛際循例加科斯  
何必贅但聞歛邑以許相國而增數十名下江科數  
太廣猶屢因台座而屢增况吾桐限窄才寬所當與  
吳越爭隆并非貴與懷可比僿者乎往者邑有翰史  
俱得請加邇來庶常首選端尹群列且頻開之銓席  
前歲已擬牘請而遲未上今賓興之期適借鼎鼐之  
重固江鄉山川有靈然前案已定獨是遺珠之試吾  
鄉先達往往利此捷徑乞檄之學使君俾錄遺破格  
較舊數或倍之或再倍之不則亦畧當正科之半大  
都多多益善皆粉榆之慶亦桃李所托也環庠懇禱  
筆舌難周惟有詠瞻曷勝披述

上蔡文宗書

代邑紳

生等跼伏山鄉爰共薪醮仰瞻雲漢甚盛際也竊有



聞于下執事敝邑在明興初宦籍稍乏科額稍減時  
尚未逢賢師帥為鼓鑄耳及蒙進賢饒師陳師豐城  
徐師拔雋儲英簪纓蔚起歷歷南州高士于桐皆有  
佳緣洎今碑之祠之不且暮念乃臺臨之期適值彈  
丸鼎盛望庇斗山當何若矣春正邑諸生案下人盡  
心滿其後乃有紫綬之報天若留以待遺試之繼請  
者舊有許相國開歛而增科以數十計近有丁相國  
開池而增科亦以數十請其請多未得者知臺意姑  
示恩數畧與劉鼎元等非可與茲之請者類也且蘇  
常諸郡舉數本廣又屢因台座而屢增獨敝邑限窄

才寬將同處陪京同隸憲府而應選盈縮偏殊能無  
滄海遺珠之歎并生等亦覺山川不光往者邑有榮  
幸例得加數頃蕞爾地徼寵聖朝者既倍則徼惠台  
臺者亦欲倍矣敝邑遺試一途最可占旺生等每多  
捷足于此敢乞遴才破格以宏登進大約黌士幾六  
百而正案僅十之一已似寥寥即錄遺倍昔可當前  
案之強半亦未為浮溢也倘以號房之不足為慮則  
益轎之制行久稱便諸生亦第求廣額而不必廣坐  
耳此京國盛典正愜台臺作人雅意生等用以達葑  
菲之下情仰甄陶之大象伏惟台鑒曷勝屏營



與方楚撫書

弟之來亦窮猿投林無暇擇木耳少負才資芥視青紫而屑屑赤白物乎半生強項一朝搖尾竊自羞之然而骨性尚存終不墮寡廉鮮恥一格因科試僅得平等兒復錯過機緣長歎出門非得已也及覩衙清似水武弁未一過問而他事又無涉將遂掩面徒手行乎且也三世托交五旬投老一丘隱計萬里行資俱需此舉而故人戀戀久矣亦垂范叔之憐如吝此升斗水而云歸里別激西江是索我于枯魚之肆也可否一決就道襄陽南人不復返矣

啟

候景陵劉會元啟

代

伏以日兔月烏明奎垣聚五雲龍風虎合台位排三玉英文府珪璋玄圃集雕章之不盡鼎烈榮階樞鉉朱垠瞻峙望以非遙恭惟執事水擊西江三千澤吞雲夢八九鴈橋蘆荻第一人鴈塔題高鴻軒薔薇有个士鴻關飛捷聖牘印周情孔思書靈曉夜報元魁儒纓飄宋艷班香史力春秋尊帝子錦帕牙籤叢繁掃月露而典索丘墳鍾鳴鼎食蔚興標霧靄于岡巒島嶼瑣門桃李舊登庸衣鉢讓仙班綸閣竹梧新入

直囊琴沾御氣金蓮歸路萬聲揚拂草之旂紅藥翻  
堦五色映判花之筆儼瀛州乎天上藐吳會者人間  
慕蘭何其責沈宜矣某披褐無懷寶心蓬面蓬帶經  
有遺珍口澤手澤陽君泪下再鈎寧必肖前魚樂子  
顧來十駕尚堪鞭後馬南燕北越豈安驅馳慕楚朝  
秦未干謁見囑雙魚於綠浦好字去蓬萊想隻鳳於  
丹山幸音回桐梓

候崇陽王御史啟代

伏以金鋪閭闔鷺鷥先殿上珥彤岳立玉輦康衢驄  
馬代仗前衣繡山搖草木蕃則賢生五百菁莪盛故  
英異三千恭惟執事瑞來岩秀川澄績起江嚴地重  
芝城製錦移鳳凰兩岫之雲桃縣栽花運鸚鵡一洲  
之雨望之猶麟猶鳳龍老子正於柱史神奇得之非  
熊非羆鷹太公合以稜官威厲唐子方新知諫院豸  
可爲肝郭中丞暫入留臺貂應在首某霜溝斷棄繪  
米難施雲陌隔遙素翰可托生不願封侯戶鄱湖曾  
晤一條水死何敢稱師門桐國已虛三尺雪孔融世  
誼榮倚蒹葭仁傑家輝鹿分桃李黃河潤萬里便自  
天來丹壁聳千尋直從地上寅忱早達午照時臨

候黃石齋宮詹代



伏以歐陽從何處得來天下之文莫大乎是司馬無  
一人不識當今之世欲舍其誰蓋海島而生異人正  
猶驪龍發於孟渚令國家而無才士何必鳳凰遊於  
岐山見龍利見大人詢鳳惟詢天老恭惟大師相臺  
下星呈玉馬斗授金虹緝柳編蒲恨二酉藏書未盡  
馥蘭摘藻笑六丁索稿非奇日近八花磚朱衣雙引  
霞舒五彩筆綠綬再升鳳燭賜金蓮又見青藜光炤  
雉膏需玉鉉卽看白麻詔來某鸞鳩槍榆燕雀依棟  
入海濱鄒魯文不在茲乎學者稱爲北斗知當代伊  
周任以天下也蒼生望屬東山羨李郭仙舟未赴龍  
門而御李近程朱師席將撤虎座以皈程肅候蒲時  
尺素聊通蒲裡誠抒葵日寸丹可鑒葵中對盈盈一  
水之遙希汪汪千頃之納鰲頭善戴雀尾知搖

答宋進士啟

某空腹便便寡言呐呐簡未狂之簡奇不法之奇鐵  
硬頭顱惟恐觸天有缺玉清腸胃詎知對月增輝茲  
侍明公於春風班齊屈景并覩郎君於冬日秀出郊  
祁鶴表野中猶見叔夜鳳毛池上不數超宗時狎麈  
談夜勤杯酌南樓真是興忘驕貴而喜據床東閣亦  
非賢許英雄而驚失筋嘯歌容阮籍之酣放鯨吸乎

恩波領受效劉毅之濫收鰲戴乎惠海纔膺別贈又  
拜遙臨供逸少之好書而墨名極品難名其無極無  
無極之情期孝伯之熟讀而筆續騷篇還續其反騷  
反反騷之志以致尋常酒值乃經咫尺械傳宋餽兼  
金王珍萬鎰謝章倚馬寄帙雕龍此函聊足披襟餘  
集尚須開市感深愧汗會罄離悰不一

穀城令阮實甫死難請卹啟

爲孤忠就殞優卹求榮以重朝廷以光泉壤事阮某  
忠節恐墜家聲賢良欲成宦業香餌之下有美魚方  
期以論功賈勇破巢之中無完卵寧免于无妄罹災

入虎穴探虎子班超三十人之志頗雄履虎尾撩虎  
鬚盜跖九千人之威更虐案牘無一事坐冷氈復坐  
針氈刀俎試千場點民簿如點鬼簿諭以當宁之聖  
武而不之省警以上臺之德威而莫之懲自夏五之  
聞烽洎端六之脫幘連聲索印殺將已不離身上馬  
催行罵賊何曾任口題壁詩句血泪未乾拜闕衣冠  
音容如在紅旗一到白刃雙加體無完膚骨有餘燼  
死不離署中片席天知地知擄不留筭底寸囊金注  
瓦注德行政事下已見於頌稱方正賢良上何負于  
保舉然而忠魂未錄九京之恨空賫孝思無伸九閻



天目堂文集 卷之三  
三五  
之叩誰達伏乞藹仁人于義士早上封章蔭孝子于忠臣俾沾卹典庶幾澤及枯骨楓宸有西伯之君亦且春被向陽槐階爲東王之父矣

候陳中尊啟

伏惟師臺才標高矚斗斗更祥華政錦爛春雲雲多瑞澤天鍾奇奏生桐城而令桐城地借分臨居花縣而調花縣江以北而兩宦慕尤稱朱邑之鄉斗以南而一人恨不覩羊祜之石忽承徵文之一介頓驚戴德之千鈞小伎雕蟲尚肯授以災木附青雲而益彰深仁絲繭能無勒以貞銘與白日而並燦英聲潤金玉高義薄瓊瑤王舊令惠經隔歲猶如何武之旣去而心旌甚切奚况赫赫之有聞秦新尹誼屬同年每念鄧侯之不來而口碑空煩未若班班之在紀某甘棠窈蔭桃李霑膏黃童白叟之謳歌倩儒生之筆舌丹篆綠書之模寫煥夫子之文章銘字銘心鏤言鏤骨但以狂蛟鎖處豎片板於東橋以記勲敢于便鴻飛時通寸楮于西舍以竢命

請陳郡守啟 代

紫氣真人久注東函之望紅光仙史偶符南郭之遊王月在春瑞霽甘雷而有脚使星向曉依雲就日以



同心恭惟執事斗標榆里岳聳楓宸製錦花封于昔  
垂簾映彩握蘭粉署而今拂綬生香八賜膳于洛濱屏風  
紀其姓氏出治繩于渤海草木知其英名惠洒千膏  
初借波于皖水文成五色先瞻彩於桐岡金鳳詔中  
將催看槐龍之舞銅虎符下姑爭爲竹馬之迎某等  
泥塗螻伸焉敢望玉皇香案道左蛇伏猶欲承金人  
露盤以古百花之辰爲今一茗之候元規塵何人揮  
去正宜奉扇底仁風歐陽面何處得來冀得陪樓閣  
明月露洗草茵鋪葦履步聲遙聽尚書來風拖柳線  
挽絲鞭盃影對邀供奉飲

候兵憲啟

代

伏以漢刺史唐觀察宋轉運衙愈改而位愈尊水司  
齋陸儲糧邊備兵職愈分而權愈重貞百度肅百僚  
星煌夾電明五刑弼五教露靄翻霜同萃歸隨咸蒙  
臨畜恭惟執事文奎寓直憲斗升華東南抱紫氣晶  
熒珠霏咳唾西北食立英沆瀣玉鑄丰標神羊鐵作  
肝山望繡衣搖動威鳳金爲羽海迎白簡分披草木  
盡皆知屈軼效靈而指佞花木易爲煦萑苻駭魄而  
彌爭四國于甸于宣政異珍珠合浦三府匪俊隳作  
名在琉璃御瓶某品卑而蒞巖仕淺而任峻治大邑



如烹小鮮無一袞衣上補負短才奚馭長駕有雙舄  
履來趨讀豹韜犬韜今正逢五兵振領望龍節虎節  
昔曾知八讞平反上懸水鏡而萬炤不疲應有人望  
風解綬下捧水壺而一操勿改豈無吏就日彈冠思  
攬轡而激濁揚清離明覩炤天之燭道張弓而抑高  
舉下豫和通貫地之塗茲其春脚斗旋久矣午心日  
向葵傾下展芹曝遙將拜清塵風斯在下鳴素悃天  
此一方汪汪霧涵岩岩電矚

侯王總憲啟

代

伏以千里岫屏依憲府煙青霧冷亦生成威萬川水鑑

映廉臺月白風招皆聽炤旣龍節復虎節輔以英篋  
芝函方豸冠卽貂冠飾以金鐫珠璣迎遲竹馬候近  
槐龍恭惟執事六符兩三台四岳十二牧文章直射  
黃金榜衣間柳染從九烈神宮姓字高題白玉屏柱  
上松生出三公仙府由壁水而筮鼎三禮榮膺歷錢  
塘而躋升六察尊首某鵷鳩豈能負漢蠅鼠反值飲  
米雖望日驚鞭柳線亦堪驅後馬然臨風學釣竹綸  
安得勝前魚徼庇蘇公之二天求展龐令之一日襜  
帷駐處星隨使節以遐飛械櫝將時風遡命衣而下  
拜瞻岳峙懼未覓趨叩淵涵感如鰲戴

迎朱司李啟

代

伏以依綠水汎芙蓉幕裡誇玉環之蕊觀碧濤開芍  
藥園中報金帶之花清宜在鰲禁鸞坡登瀛操斗柄  
榮將入螭坳鵲觀借海作天梯欲看槐舞雙龍且近  
竹迎萬馬恭惟執事宋艷班香潘華陸藻吸西江烟  
雲以膏丹筆檄拘斷鱷文章令政事爭傳探南海日  
月以曜朱幡笏擊銷蛇正直與神明並著風稜起座  
長庚八九月西肅金天雲物登臺貫索十六星東沉  
銀漢徐堅具鳳閣舍人之樣銅虎綬題輿上座魚佩  
帶紫馬而羣驅歐陽當龍門留守之心玉麟符畫賦

端寮鵲車隨白鹿而杳蕪况青瑣輝于棣萼柳篋聯  
芳且彩鈴兆于蘭芽槐吡日繼茂某粉榆之接非遙枳  
棘之棲實邇蘭芷可佩頌懷瀟湘之故人草木盡知  
似到江南之刺史龍光應咫尺聞玉里鳳凰來泣思  
獻璞燕庇豈尋常候金灘鷓鴣下笑願築沙指日旌  
旄馳風竿牘

答陳明府啟

代

伏以瓊榜蜚英喜托寅恭之並琅函走賁慚承午炤  
之來碎北胡之琴久已爲王適評鑒懸南州之榻何  
敢當徐孺知交朱公南昌人故云七襄無其報章百朋有其



謝牘恭惟老寅翁台臺楊金竹箭

會稽產竹箭故云

崑玉桂

枝明四明之明萬里點蒼供彩筆秀三秀之秀九重

飛白賜朱輪

四明餘姚山三秀同安山

置水鑑于苧溪然犀當燭

儲冰壺于荔苑載鶴隨琴槐影老龍待見雲霄直上

桑陰童雉許教風月平分某匪燕石藏如蝨山負占

龍光而知星聚苟讓陳賢卜鳳瑞而知雲昌舜餘姚

盛潘令桃艷于陶令柳何時能並轡看花萊公栢蒂

似召公棠有日得扳轅窺樹瓊瑤近錫珪壁遙臨色

與槭飛神因幣拜

壽林吏部啟

代

恭惟執事丘山岌岌音歌栲杻之山沔水澄澄香授

蘅薇之水玉源道主今來玉山炤人瑤池真仙昨向

瑤堦觴客鶴廳植顧憲之佳樹從不作餘曹螭切降

裴楷之新麻更還需啟事五百年而且暮遇李下絕

蹊八千歲而春秋延椿高當路

某

登龍願早放鴿詞

遲先甲開後甲之丁年芹曝欲申而尚未雄甲勝雌

甲之辰景葵傾向午以惟寅祝有滄海千籌海涵則

潤獻無函谷一軸谷納其弘

納婚啟

代姚與張

居分斗野系屬弧垣楚畔比鄭白之鍾盈吳濱追虞

魏之鼎貴名香古渡龍眠草亦聞知

舒號龍眠古渡

德瑞高

山鹿起花猶啣舞顧晉波之餘及令桐岡之在霑鴛  
子識韓傾蓋而篤世講鯁生責沈解纜以結同言幸  
蘭茁其芽愧葭倚乎樹敢云孫繩乃祖擬姚氏感虹  
之墟嘗聞女歡于男效張公夢燕之宅如葩在地相  
映魏紫姚黃似曜經天並輝星日張月向翠屏而射  
雀自覺弓長對綠窗以占凰遂成女兆鳴珂號嘉貞  
之里雖雖始旦而來夢水語公徵之家靄靄方春之  
候寸錦未達尺素先通俯布寅衷仰承丙照

回婚啟

代姚回方

伏以秋宵餘鴈析依稀引鳳天音陽月轉烏輪掩映  
乘龍旭氣貯非金屋神庭授瑀箭金屏選豈玉牕仙  
路遇瓊漿玉杵聽命於吉文定厥祥恭惟執事代雄  
白鄭舊契朱陳繼墨綬之宗風才劇賈壘傳縹箱之  
世學芳植謝堦令郎器耀青霜劍吐芙蓉出匣弱女  
詠慙白雪裳裁薜荔盈筐問鏘鏘鳳古告兆在雲岡  
之五色佳氣葱葱瞻盈盈鵲渡報章成星河之七襄  
好音粲粲門媿方幅奚數周室名姝村重姚墟敢引  
虞廷聖女黃華綺麗垂蔭姚家之黃大凹巍峩依秀  
方輿之大絲蘿幸結瓜瓞祈延



聘梅氏啟

伏以桃碧杏紅春遠依然花王之倚梅溪橙黃橘綠  
秋肥何似鹽梅之助王國物譜天公配傲山猶可撮  
雙尖姻書月老傳秦水何難歸百谷川巒而呼衛樂  
郊市乃告朱陳恭惟執事握懸黎披結綠時鸞鷺飛  
鷄鶉智刃于鏌出匣芒凌夜漢英規琬琰振衣芬襲  
寒霄宗祀夏殷封誰儔舊木戚盟秦晉偶莫附新蘿  
窈念生姓同從易有慙鳳閣門高任名借子安無望  
雀屏閨秀烏衣巷坦腹臥處玉關何幸入來壽陽宮  
點額粧時金屋忽教擁去羅浮枕底夢還熟松林地  
冰魂留月落星橫鶴樓笛中吹不殘菊花天玉骨對  
霜高露下換萸之葉八矣秋以爲期標梅其實三兮  
今復何憾惟鸞音稍先乎鴈莫俟塵誨並及于驂臨  
寸絲辰達寅衷尺素午輝丙鑒

雜著

桃李門公論

粵觀唐之爲周而歎狄之卽爲唐也人幸其門之得  
人吾幸其人之得門也夫大臣者能闢四門亦能閉  
門掃軌爲公孫弘之東閣則賢門矣爲林甫之偃月  
堂非奸門耶爲劉溫叟之西舍則清門矣爲郭況之

黃金穴非賄門耶而况梁公之時何時乎帝窺房州  
公門弱矣后酖椒室園門亂矣臣而跨鶴子晉也倖  
門啟矣僧而白馬寺主也穢門張矣歌桃天於后妃  
成周有桃而今無甘桃矣傳李祖於老子晉州有李  
而此無真李矣天生張柬之姚元崇桓彥範輩者桃  
之葉有蕢其實武陵之奇葩也李之華偏其反而華  
陽之異種也顧當糊心眯目之世處擢搥盃脫之朝  
蓬蒿臥耳誰則採其春華蒹葭倚耳誰則掇其秋實  
天又生一狄梁公者謂上林之樹惜其無棲也海外  
之槎惜其空汎也而薪之蘓之培植之灌溉之又不可  
令其九畹也三徑也而門墻之于是乎正月之花不  
啻羯鼓催也而桃李之信不可妄催九月之梨可爲  
霞觴賞也而桃李之貞不容輕賞花須連夜發莫待  
曉風吹舜華之植可遠也而桃李不可遠不信比來  
常下泪開廂驗取石榴裙石榴之綺可藏也而桃李  
不可藏蓬蔴似直張燕公之僞也而桃李無僞梅花  
偶賦宋廣平之變也而桃李無變六郎似蓮張昌宗  
之媚也桃李可以振之蓮似六郎楊再思之佞也桃  
李可以折之花萼樓中改爲章臺之柳桃李不傍其  
扉蓬萊閣內魂入羅浮之梅桃李不倚其檻惟是一



蒲樗而面奪緋袍公之正如松栢也桃李偏受其樾  
 鸚鵡折翼之夢以宛曲導之公之調人如芝蘭也桃  
 李偏借其芳母子姑姪之語以慷慨破之公之救時  
 如菽粟也桃李偏收其用將見春園未吐辛夷開而  
 桃李亦開公為之雨露也秋江既冷芙蓉萎而桃李  
 不萎公莫為之霜雪也至于五王奮臂二豎授首雖  
 補天浴日若桃李之爛雲爍景哉然非撐天一木斗  
 南以來之一人將誰托耶故曰不為其門幸而為桃  
 李幸也是為論

茶梅賦

橘綠謝橙黃別不嫌老圃秋容且看黃花晚節亦足  
 以見幽芬矣而孰知茶梅之為杰司嗑鳴飈調調刁  
 刁宋賦溯滂潘賦窳漻蒲柳先零松栢後凋黎女簪  
 收茉莉山公啟卷芭蕉笑造物之意盡比生人之氣  
 消菊越序而侵冬茶逾曆而延夏彼梅信早芳兮亦  
 晚芳乎倏乍其應候也或愆其界期也或借有如的  
 的凌寒徐徐養化托乎茶與梅以忘品題擅乎茶與  
 梅以超聲價大器晚成大造晚形蒼昊愛寶朱明斬  
 靈方其杏坊碎錦花閣綴鈴柳染衣兮螺黛綠草拂  
 綬兮銀瓊青與夫衣製芰荷冠纂芙蓉而皆落落如

天正堂文集 卷之四  
晨星郅誦之桂別院王祐之槐異庭士窮見不朽歲  
寒見寧馨紛英蕤之馥馥昂勁節以亭亭嗟彼酪奴  
沉彩千古鳳餅龍團忽逢陸羽且離騷之忘梅豈海  
棠之遺杜於林和靖爲知己今於屈靈均爲不遇主  
知之者謂真梅仙之在吳門不知者有如列子之在  
鄭圃及其何草不黃十月隕穉姑蘓之紅未花羅浮  
之綠無萼山谷初題京師盛作疑蠟丸之詔東平實  
瓊蕊之綻東閣拊石鳴球磬美可掬貴以譽其口賤  
則詆其目天不移芟春臘殊栽地不移枚南北齊開  
骨高無揜不亭而臺韻高無叢不園而匝孤香自嗅  
蜂蝶未來孤光自吐鶯燕俱猜惟寶珠之競爽若荳  
蔻之含胎梅靨笑矣梅心酸哉宋廣平歎其榛莽王  
安石訝其培堆然而傲能鬪雪靜不驚雷於夏正爲  
殿歲之將於周正爲占春之魁友則侶乎煮茗相則  
佐以調羹豈曰無名一物而兩名交并豈無知己千  
載而下有王生爲賦之矣

東橋碑記

代

山城百堞肘北流而腋東渡孔道亘焉桐之稱劇驟  
崇期者此矣伐木梁之爲圮爲桷而輦用石趾延袤  
闕隆則今禮垣陳公之鼎構也湖湫龍厓鸞刀先試



乃三臺監司以利器必于盤根錯節也移劇吾桐雉  
桑陰接浦柳煙通皖公逶迤相距者幾而比壤之民  
各攀義馭而爭所天截鐙留鞭竟無如花迎墨綬何  
也自是而桐絃歌矣鳳山斗望樅水雲膏風無鳴條  
雨無破塊而河伯有靈亦若斷鰲東負梁架奮鼉矣  
北流活活東折而南障東北之窮惟一崖流而下皆  
蕺隰水映咽而壤濺漏嚙幾及城小一畧約烏足當  
蛟蜃怒則杠孰與輿梁便治梁于桐與湖異湖治嵌  
礪硤間叱石成群朝輓夕至藉膠柱策此他山之石  
遠莫致之鞭石令血豈復海上神驅耶溪來三十餘  
里泓不長無大澎湃無須河厲爲則倚孰與木梁便  
溪之左遙岫拱向如可扳拉北障陡絕形家謂引脉  
使紆橋故趾凌上宜下也環溼而居皆勢家金甌地  
急公惠政遂半割以瘞犀而橋今稍南則規擬難藁  
爾敝賦悉版大司農公閱實盡謝納緩囊無如粟少  
許出俸餘爲釀金倡又步禱澍雨俾年有秋人樂召  
募廉能聲迄今猶樹風也計橋修十五丈而贏衡丈  
五赤而贏崇三丈下極湫底無筭而楹櫛比僅夫尺  
有咫而贏石趾凡十陛而縮計費二千緡而縮匪公  
其誰爲銖銖而寸寸之也則征繕難里父老故駟謹

寧願勞勩乃能與諸曹椽精白聽命夫禹時猶有聚瓦礫而逃者况今乎匪公而築鄆浚洙皆怨也則督任難且也南岸膚立恐下流爲壑從廷尉方公請堙河之一涯而甃其表戴角有鐵蹲鴟一新東南保無無尾閭洩洩復遺金十百歲爲葺橋資幸薦蒞桐之明年邑有趙氏懷清捐貲大葺命紀綱僕三日告竣亦子來一驗乎匪公而靈沼誰攻况永終勸相乎則維護更難擇兩便于萬不便之中成四難于一無難之後而督撫上公績矣温室樹邊夕闌月下祈公儀表其司而旋且台衮移也乃甫拜青瑣卽䟽停馳傳夫累轍疊跡館粲繹騷害等潰川也公以津梁桐者津梁天壤輪蹄影絕臂趾魂安河之潤其恩洗萬家春乎有嵐桐梓美哉洋洋未雲何龍澳梁虹起公惠能政明德遠矣萬安仁渡富平義津勿剪勿敗召公所憇後之叱馭斯橋者其似公花迎墨綬時哉公諱贊化字金鉉別號襄甌朝州人壬戌進士自湖蒞桐越四年所桐人士德令者議勒珉多未果公去未暮而峩然肩負矣蓋尸祝盡畏壘云

筆花堂記

崇禎十三年春計爲寇起秦晉之十一年擾吾江淮



之六年矣日經馬塵砲霧中以爲橫天下惟有刀劍  
安得復生毛錐及踉蹌至臯城之西憇江君樓見一  
塔依依其右若古弼公銳首而前堪入腕指之搦焉  
噫嘻其筆耶以語江君而笑微微寇稍却氛變彩矣  
雲霞絢結於塔之最上斑斑莫辨其幾鱗鱗五花成  
毫相光疑女媧氏補天之罅爲浮圖合尖也噫嘻其  
筆花耶以語江君而笑微微霞落日寇去客睡有  
古弼公銳首而前若小傳所記毛穎君求見班定遠  
者噫嘻其筆夢耶豈吾家王珣之如椽者大若再耶  
以語江君而笑微微噫嘻我知之矣筆花其君家故

物耶笑吾之夢而君也真耶入視其堂已有匾之夢  
筆者予亦笑微微也何也夢筆之於美未盡也文通  
之筆夢凡再老人索去文思頓減豈夢之得耶惟取  
其花五色者近是且也馬裔孫夢筆而非花李白夢  
花而未五色更曰筆花誌異矣然以名厥堂尤有進  
於是者世之擁高居以鳴得意者其次則嗛嗛食粟  
肉張鮮衣怒馬爲盛容絲竹粉黛之不撤於夜酣朝  
呼之側者肥澤吾堂也其犖犖則朱緋金紫凡一歲  
四賜衣於其間上坐百千下逮丈旗左右皆環列夫  
多謀善藝荷戈執戟喜則加人於膝威則能報怨雪

恥酬先人志於千古令生平德我者頌淮陰侯千金其漫無德怨亦令之覘窺駭汗恨不早識范睢法正於一飯之恩快哉丈夫之堂乎不則經史仙佛子集詩琴蒲團長柄塵行住坐臥於羲皇上人若瞿曇若海上三山瀛洲吾堂何必天策之府于堂也哉夫功名富貴文章道德之難兼致也安享者以位業爲勞而志烈能仁之士輒薄山林牀蓐者之無足比數人之相笑寧有旣乎如其文著武成孝忠各報退而偃仰清虛優焉卒歲方以內方以外之樂堂實兼之卽不幸馬塵砲霧如今十二年之十室九空僵屍七千里也亦以吾管城君綸巾羽扇揮斥何難得鳴劍馳伊吾者而用之卽今天柱折地維缺此五色花何減女媧煉石也長吉云筆補造化天無功夫亦曰有筆花存有筆花存乃予記塔者何也子桐隣縣曰潛有劉左伯之兆甃塔爲筆峰而其嗣遂登狀頭形家固有靈哉噫嘻古弼公銳首而前其峰耶雲霞之絢結於上其四爲瑞六爲喬耶其七爲麟五爲鳳佳氣哉鬱鬱葱葱耶予之易命才而難卜兆也蓋重青烏白鶴氏之言如此

新義社會記



社神於勾龍氏鄉國代祀焉國社或以時屋而猶仍其祀於鄉重土著也鄉殊里里殊祀新義一名合都遂稱之其舉爲會也則吾巷柴衢漢魯子敬指困處也會以飲舉者則楊蘭似大父輩歷有攸傳而巷之諸長者共之至今存也意其初禪不以壇祝不以尸顧名起義耳至家君與鄧氏乃人其像廟其座座以便舉移而像爲設配置嗣父母之子孫之儼天地而人物之三才列矣二分五成歲再舉祀祀無出鄉鄉無遺戶單窶無忍外強年以下無敢速成而躡進焉舊制法備意甚善也洎今尚何可言城之隅曲盡歸世閤居不得安鄉土矣徒就靡常故新更屬會額十歲一直而春秋直者次勿紊亦毋他誘卽傾儲充庖無違色後至及醉亾酒併有禁無貲者將肥脂豐甘於神人之前已難矣而况乎名勢機力之相軋又何異乎去者不復居居者不復舉而告緩期告避坐之紛紛耶嘗聞之家君之訓曰忠厚曰儉勤茲紛紛者胡其傷于儉而黜于厚也蘭似來相誠曰衆心貳矣物漸騰貴人漸貧田家斗酒相勞及桑柘醉歸之景漸索也流遺善俗兩代尊人始之今桐社四起且慕茲祈報敦睦之誼而繼焉豈吾儕不克振舉其一言



爲粉榆勸王修之孝罷社君其以孝興社乎予則淵然慨念于申鑿之篇也僞亂俗私壞法放越度奢敗禮茲之珍錯滌澹特社政一蠹耳凡我同人抱誠守約藝而田疇植而子弟懷金紆朱富貴壽善家盡烏衣朱雀人盡無懷胥庭雖無老成人猶有典刑覩茲社如覩先人風澤矣國家開闢千古宗社自卜世靈長後茲社者亦與之俱新新不艾斯大義矣予多隱仁尤有隱憾大似昔董龍在社時而得隨社發舒更新乃義矣若夫人以二十坐惟齒盤饌以十酒無量鏹錢以三十金如之平明神會昨飲卽已亭午賓會歸必適期祀畢之晨次宜舉者躬迎還奉之堂右將及舉先旬日折柬以召二三沿革則俱有成議焉條其便宜以與父老約

高廟建文昌祠募疏

桐治固稱名區形家猶惜其東薄于西西則陽闔陰璇間巍然秀峙唐邑侯張公祠在焉公捐生禱雨厥配投崖泝流屍相抱于龍眠谷口因合葬其地矣而姑廟於近以便祭謁然沿號從山曰高而額新爲境主名者嫌之徒虛建耳議者謂天乙勝方匪文昌帝君孰與靈之且帝生越雋徙梓潼皆西也祠於城亦



應西吾邑矜紳如林翰藻蔚起何莫非斗極錫之輝  
乃錦棚以明富貴彩壇以奉仙釋青豆之房赤華之  
界所在綦置焉而文像清肅曾不得鐘簋而布磔之  
天其故缺此靈囿以待山靈乎嚮雖祠于巒之南閣  
于河之東復宮于郊之西然庠子祀不及他宦氏祀  
不及外不則廢縣浮沉遠莫致之耳爰卜公祠之左  
仍石疊基卽松栽構期大其軒俾與公祠相稱址甚  
旺途甚邇其羽人嚴承吉有披戴爲清溪道士長又  
馴謹能理行乃事香宇嘉薰燈祇遠照知其可立就  
也世尊說四梵福若能補理故寺是爲二梵經云六  
度一日施五戒一日貪故歡喜檀施便爲結志隆雲  
是所望於文好者抑愚猶有進焉帝君世幻化世徵  
報圖傳至託之爲張仲夫吉甫文武憲萬邦而帝號  
神文聖武其與友似不誣然詩曰孝友而晉唐宋封  
歷有加曰孝德忠仁旣聖矣焉用文之按天官書文  
昌六星在北斗魁前爲天六府天文志文昌近三台  
司命司中司祿是星以帝顯非帝以星尊也文以行  
兼非行以文重也若是則操觚操弧神並司之施家  
施國神並司之而紳而衿而瓊弁而布衣皆得請命  
焉珠人得珠玉人得玉誰謂採山者不必問海而採

海者不必問山耶奎壁有靈容光潛底明鏡不疲於  
屢照豈神驗之一爽也則羣有造於邑人士者邑人  
士之植施蓋無有量也

募鑄幽冥鐘引

代

幽鐘云何以衆生五千四十八苦惱故金重之數如  
之而且晚延扣則無數矣或爲天竺難曰冥陽之隔  
不知幾由旬而聲徹無間乎阿僧祇歷劫而一擊之  
力頓再解脫乎在鑄在縣不几六州鐵不成一字乎  
余唯唯否否五蘊三幡不外色空二義惟聲聞天籟  
非色非空卽空卽色五行之聲惟金三品蓋兌澤偏

得乾清乃善鳴焉及鳧氏鑄鑪則交坎合離靈氣鐘  
之矣記曰鐘聲鏗鏗以立號白虎通曰鐘之爲言動  
也八音之列金爲長金聲之動鐘爲大已厚則石已  
薄則播侈則柞弁則鬱長甬則震大則聲舒而遠聞  
秦皇建千石者十二漢高建十石者十枚而皆置諸  
廟非以振幽耶顓頊浮金高辛舞鳳豐山鳴霜黃河  
鳴雨與夫練門之得珠祁陽之化鶴非神物也耶而  
况乎上接莊嚴之境下壓歡喜之地佛號冥蒙附隸  
惟以顯梵唄幽寂托追蠡以明靈鷲傳音共蒲牢而  
應和伽陵布响勝鯨魚之擊撞加以僧力唱揚衆情



天耳堂文集 卷之四  
三  
呪諷心燈夜炳可徹丘仲孚之夜聞意蕊晨飛足發  
杜子美之晨省寶坊耀日一鐻亦自光宣玉塔生風  
兩欒忽然吹颯彼泥犁耶人耳根未斷聽緣無遮憂  
拊鏗訶潛底震起餘韻飄忽劇苦鬆踈茲鐘不且爲  
慈津而施者受者不且爲大願船耶筍簾不移廟貌  
如故其爲摩訶薩救度自他寧有量耶作是說已僧  
當視如詠月佳語也而喜極爲敲數聲

梭龍社引

天絢離文七襄組織地舒震氣九鱗崢嶸雖質隱於  
爲虬爲蛇然章成于自杼自局去則捷于風馬寺壁  
裂而兩睛夜飛來則應于斗牛平津開而雙角冥合  
故雷煥掘豐邑猶能拭寶劍于赤山豈陶侃令樅陽  
不可拋靈梭于蒼野皖江之濱有怪物桐溪之藪實  
多人壇訂鷄林不數管寧三社節臨虎艾正期盧肇  
一標石鯨鱗甲動秋風何似扶搖一擊泥蟠而天升  
織女機絲虛夜月恍如綺絜千言波委而霞蔚鶯穿  
嫩柳流黃共鏤管爭花蟾吐新芽報章與赫踈弄彩  
運甓亭尚在惜陰效禹當令樗蒲博陸悉投江中射  
蛟臺非遙作霖同商堪比木屑竹頭用充朝國群九  
無首幸擾狎而就馴十萬在胸須乾惕而卽躍從雲

構會得雨超騰頭角倘屬吾老成首領敢讓君英少  
童南軒傳

樅之陽爲治地古也徙而他以水映咽而壤濺漏也  
其居無高門鼎貴魁岸豪傑特以鄭白甲諸姓者曰  
童以瓜瓞蕃庶甲者亦曰童以花萼敦睦甲者亦曰  
童乃去陶侃舊署而就呂蒙舊城者自南軒之擇枝  
始藉非柳下標惠槐前種仁烏能陶朱于齊復陶朱  
于楚也哉始之來無枝三匝貧不逮北阮遠甚亾何  
陸橐盈矣非復赤洪崖打白洪崖矣年六十二而褒  
衣博袖之子若孫射利財豐水積于水矣章甫逢掖  
之孫復孫瑤環瑜珥蘭茁其芽矣藉非柳下標惠槐  
前種仁烏能再昌再熾也哉聞其人望如岳峙卽如  
淵涵狎之如未孩時訥訥不出口遇大可不與鄉隣  
鬪爭輒侃侃排決之刺刺不休大氏素心勁氣視今  
之如蜮如鬼如蛇如神狙獯且三尺童之不若其猶  
有童之心也夫識者已尊之于無懷葛天而上矣得  
全于天則有隕自天祐于人而祐于家也宜夫

童母昌孺人傳

童故大姓派樅江而來市門者人皆朱頓焉男子生  
而崛奇力能蓄長益貨其婦氏亦賢多能方之舟之



泳之游之以順而富家大吉也意者家祚致然乃余所聞知孺人昌者則以德券福而非幾幸於以福券德者也德有平有奇初孺人之歸也貧則疏水平也胡然而割食養姑潔滌愜肴以茅容之孝奇之無餒遂在中饋平也胡然而右持筐理內事左持牙籌問外事以歎母之勞奇之卽如陶母剉薦曰范逵佳賓也義何敢慢亦平也其在坐不必冕衣裳不必耆年卓行與夫英年茂才多聞異抱之士凡所投轄一切奔騁僕御而宣命周求者孺人乎且歐陽之母畫荻曰文忠公天下才使成名易耳亦平也孺人有豢子暉吉教之賫志早世尋望其仲禹門三級桃花浪煖矣魚以暴腮廢而返去就雍樂是孺人共夫子拮据者復以拮据共其子力憊矣季子兩和以文名屢上御史堂射策幾中庶幾充閭之願債于冢子者今于其季厚償焉心憊矣至若以主母母宗孫以內母母諸婦以君母母諸媵妾奴隸其調諧于嘻嘻嗃嗃間可想而知也余家故物青氈坐童君之左塾者歷年所椽筆以代彤管覲縷誌之非誕也遂爲傳傳之日天啟壬戌孺人卒四年年六十矍鑠哉夫子召南翁年六十四暉吉名道光舉子徵聖仲名奇璿子甫

數歲季奇瑞偕徵聖儒科詳之

許孺人傳

南軒晚有繼室許則曩時故劍也古云婦德記以彤管士庶家其難之故名湮沒而不可勝紀予曰傳者傳也必可傳而後傳也傳于人未如傳于其家傳于家之口未如傳于其家之身如少南之敦祗恭厚殆傳其坤厚之含弘與侗儻方毅傳其地道之直方與且諸英英玉樹洵美且都傳其陰美而文中與麟之子不問知其肉角也鳳之子不問知其九苞也玉在山而木傳潤珠在淵而石傳輝有瘠土沃土之訓斯其家以言傳有就深就淺之事斯其家以功傳有克婦克母嬪則女志之遺豈其家不以德傳乎哉予又曰傳者傳也

生白上人讚

放鳩放麀放生伊始築斯鑿斯僧力無已招社者誰生白止止耆闍任身楞伽滿耳止深深菴觀盈盈水築鷲嶺頭鑿柿源髓木石林禽皆摩頂趾一塢三間功成德美嗚呼上人離殼漏子旃檀闍維葬塔初壘不生不滅無放無累如鱗在淵天放之矣

小像讚



才耶胸學耶腹德耶體節耶骨雄耶氣健耶神聳耶  
眉聰耶目河目海口文章高人論相耶不若心相之  
淑論命耶不若志命之篤命非貴勤常讀如斯而已  
乎宜夤緣恨矯拂命非富儉常足如斯而已乎宜機  
巧恨直率命非多壽多男總之寡慾人生行樂耳須  
子孫何時宜風流恨縛束宜顧目前奈時時嚴訓督  
且代代關心曲太上立德恨躁傲學含蓄其次立功  
恨踈慵學營逐其次立言人不知天鑒燭身不成兒  
勉勗孫復孫世吾族惜乎才矣學矣德矣節矣而多  
異乎俗少之時義太別晚之時義太樸技不逢時宜

乎命之慧而無福宜乎相之氣骨高而神體突奈何  
哉繇于天人雖畧盡而地尚未卜所以筋其腕骨其  
指覷吾年而知其勞碌甚至絡不盈血而膚不盈肉  
像耶像耶憤似怒慮似鬱從來無一笑而對書對戲  
則終日哭平生未了事留與後人續天耳耶聽吾弗  
地靈耶許吾不吾生平無一不可以千秋而豈其年  
僅止於旬之六老耶耄耄耶期願耶庶幾乎壽且祿

松石讚

石無天根松非桂魄巢鶴千年煉雲五色能補天補  
人豈其闕能願鳥願人豈其迫畫不爲壽壽意默默

坐翁其間三太古客

構堂四箴

唐有七字令詩從一字次至七字我明楊升菴增次至十字爲十字令子做作勤儉智仁四箴俱用洪武正韻

勤奮身免賤貧志堅力狠不憚艱辛爲儒要學識爲  
仕要功勲或商農爲家產或醫地爲身墳閒字玉帝  
所靳惜懶字閻羅所怒嗔豈子孫而僅藉父祖豈父  
祖而無詒子孫公卿士夫乃眼前天府奴優隸卒乃  
脚下地塵必得其位豈徒一官顯耀貴久且大方是  
當朝宦門

儉慎念免奢僭節用深藏常留餘贍有才休逞能有  
勢休逞焰寡嗜慾以防死少受享以防歉守官箴以  
防謫怒立家規以防虧玷謹者全家天祿有餘縱者  
一身糟糠不饜水火災荒兵寇勿使侵田園墳宅湖  
山勿使占必得其祿豈徒一子榮華富衆且勻方是  
全家福灑

智順世免拘蔽心靈計妥不違時勢文章要成名作  
用要成事或逆取而順守或權通而經制英雄行險  
險能平富貴履危危善避想做宇宙間第一流想創  
古今來第一義立德立功立言三不朽天理地靈人  
事三具備必得其名豈徒一時清高宗廟饗之方是



千古才藝

仁愛人免頑嚚延生永世常留幾分孝友更睦族姪恤更忠君忠非愚而自盡厚非懦而相親貪財恐見笑于鬼好色恐遭譴於神氣亦豪傑而非賢聖酒亦情趣而非性真此日培百十年之元脉此身渡千萬衆之慈津必得其壽豈徒一身康考子孫保之方是累代善根

邑庠公舉重修黌宮呈

窃惟魯立瞽宗矇誦傳于殷后鄭遊鄉校藥言採于公孫州遂期以樂群豈樂乎棟折榱崩增萎梁之痛辟雍思乎服衆不服者樓侵屋割等伐木之克姑分後先用陳始末自本庠建于洪武之辛亥迨正殿改于萬曆之甲寅明興逾二百年木石豈堪仍舊桐廣几五十里錢穀何難創新總由弱喪成風馴致偷安積日或視爲捷徑之蘧廬得魚而治筌奚用或指爲別家之門戶亾羊而補牢未遲李姓推張寅年捱卯士氣乃爾公事皆然茲遇兩先生經明揚震因周室墜而漆緯徒憂大父母化洽文翁柰漢學荒而葺綿可耻縉紳累百誰無百官宗廟之思衿佩近千寧少一夫當關之志釋菜者尚虔黌序采芹者忍毀官墻

千金寺而百金庵不念狄公崇泰伯五步樓而十步閣坐令魯叟讓瞿曇爰惕號乎十人逝詛盟乎三物首求師帥效張詠之貸米易瓦不日子來力懇士夫倣杜預之酌酒造橋如雲衆集儒俗俱爲喜施盡厘閉田舍之戶而罔遺富貴更宜多捐損花村水榭之費而已足恍見聖在上賢在旁雖助几許吝几許錙銖難逃神鑒還念子可期孫可望凡進于斯出于斯尺寸皆藉師靈事內者畧具肺腑自無染指事外者偶遺名目勿有嫌心則烏革翬飛藉大力而大壯庶蛟騰鳳起集同志而同人矣

姚繩先舉選太學公呈

爲儒行自珍清評衆允聖朝物色賢路人光事竊惟秀士昉于周選自旅師黨正博士昉于漢科由方正明經召信臣肇經學甲科之端唐楊綰加詩賦制舉之例明興景爍已有五星并聚之祥宋學崇隆又見一月泰來之吉宏搜膠序升入成均向非索驥于群誰敢薦鶡于獨茲有姚某者幼隨父于宦邸清白遺輝長奉母于孀闈彩斑生色承兄撫姪紹祖寧宗在大叅知爲詔孫在兩憲令爲諸弟里言無間庠譽罕儔六行所先孝友睦嫺旣備四科其尚德言政學兼



天正堂文集 卷之四  
優歷試冠軍雲六華而莫上七遊棘院日五色而還  
逃孫龍著書幾信鷄之三足王粲獻策聊覩鳳之一  
毛壯方強仕之齡堅匪弱喪之志平津侯六十偕計  
吏固病其曲阿關西公五十舉茂才猶惜其遲暮若  
弟子員而補掌故可待詔于金門若大司徒升之辟  
雍可環觀于壁水尹翁歸才兼文武且自薦諸延年  
漢文帝意重孝廉宜首推夫賈誼伏乞舉申道院選  
送雍宮庶幾吳越俊民亦爲濂洛淑士彙征茅茹鄉  
學與國學俱新材用薪樵社壇與厲壇復舊矣



1993